

# Yúsan Shiir Chichamen

## JUA

### aarmia nu

#### Chícham aents ajasmiania nu

**1** <sup>1</sup>Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham t́miniaiti. Chichamsha Yusjái pujuyayi. Chichamsha Yúsauyayi. <sup>2</sup>Yáman̄kamtaik Niisha pujuyayi Yusjái. <sup>3</sup>Ashí najanamu ainia nu Nijjái najanamuiti. Nii najanachmaka penké atsawai. <sup>4</sup>Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti. <sup>5</sup>Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

<sup>6</sup>Áishman̄ ámiayi, Yus akupkamu, ni naari Juan̄. <sup>7</sup>Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. <sup>8</sup>Juan̄sha nu tsáapnincha uyayi. Áyatik akupkamuyayi tsáapnin chichaman etserkat tusa. <sup>9</sup>Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

<sup>10</sup>Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi. <sup>11</sup>Támiayi ni nun̄kén tura ni shuarsha ni enentáin itiaacharmiayi. <sup>12</sup>Tuma ain̄ ch́kich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. <sup>13</sup>Niisha Yusa uchirí ajaras ataksha númpentin ayashímkiacharmai. Áentsnúmiā akiiniachu áiniawai niisha. Áishman̄ wakeramujáisha akiiniacharmai. Antsu Yúsnumiā akiiniawaru ásar Yusa uchirí áiniawai.

<sup>14</sup>Nú Chichamsha ayashtin ajas iijjái núkap tsawant pujumiayi. Yusa anen̄kratairijjái piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi.

Nusha iisha paant wáinkiaitji. <sup>15</sup>Juansha Nin neka asa, étseluk tímiayi “Júiti wi tímiaj nu: “Winia ukuruiní winittiana nu wíjjiaínkia émkaiti. Maa, wi atsaísha tuke pujuyayi” tiniujai.” Tu etserkamiayi.

<sup>16</sup>Chichamsha ti anenkartin asa ashí péñker ana nuna iniaitsuk súramji. <sup>17</sup>Yusa akupeamurín Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. <sup>18</sup>Chikichkisha Yúsan penké wáinkiachuiti. Tura ni Uchirí chikichkia nu tuke Niijjai tsaníaku asa Yúsan paant awajturmasuitji.

**Imiakratin Juan Jesukrístunun etserkamiania nu**  
(*Mat. 3.11-12; Mar. 1.7-8 Ruk. 3.15-17*)

<sup>19</sup>Jerusarénumia Israer-shuar ni Pátririncha Riwi-shuarjai Juankai akupkarmiayi yákit tusar.

<sup>20</sup>Inintruiniakui paant ujakmiayi. “Wikia Krístuchuitjai” tímiayi.

<sup>21</sup>Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juansha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

<sup>22</sup>Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

<sup>23</sup>Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaritjai” tímiayi.

<sup>24</sup>Juanjai chichainiakka Pariséu akupkarma áarmiayi.

<sup>25</sup>Niisha tiarmiayi “Nuikia Krístuchuitiatmesha, Eríashaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

<sup>26</sup>Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai. <sup>27</sup>Niisha winia ukuruiní winiyat wíjjiaínkia ti nankaamantuiti. Nii ti péñker asamtai wisha ni sapatrí jinkiamuríncha atitrachminiaitjai” tímiayi.

<sup>28</sup>Nuka Petapara peprunam túrunamiayi. Petaparasha Juan imiakratmia nuí Jurtañ entsa amain amai.

**Jesus Yusa Murikrinti**

<sup>29</sup>Nuyá kashin Juan Jesusan winian wáiniak tímiayi “Iistarum. Núiti Yusa Murikri ashí aentsu tunaarín júana nu. <sup>30</sup>Núiti wi timiaj nu, “Winia ukuruí winiana nu wíjjiaínkia nankaamantuiti. Tura wi atsaísha tuke pujuyayi” tímiajai. <sup>31</sup>Wisha Nin nekaachmajai. Tura ashí Israer-shuar Nin nekaawarat tusan imiakín támajai” tímiayi.

<sup>32</sup>Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai. <sup>33</sup>Nu túruntsajin tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Pénker Wakaníjiai imiakratniua núiti” túrutmiayi. Tura nujai Nin nekaamjai. <sup>34</sup>Yamaikia wainkia asan ti paant nékajai tí nekas Yusa Uchirínti” tímiayi Juan.

### Jesusa unuiniamurí emka armia nu

<sup>35</sup>Kashincha ataksha Juan nui wajasmiai ni unuiniamurí jímiarjai. <sup>36</sup>Jesussha nui nankaamakui Juan tímiayi “Iistarum, Yusa Muríkrí áuwiti.”

<sup>37</sup>Juanka unuiniamurí nuna antukar mai Jesusan pataatukarmiai. <sup>38</sup>Jesussha úkumur ímias nu jímiaran wininian wáinkiamiai.

Tura tímiayi “¿Ya earam?”

Niisha “Uuntá, ¿túi pujam?” tiarmiayi.

<sup>39</sup>Jesussha tímiayi “Wats, iitarum.”

Niisha wear ni pujutairin wáinkiarmai. Tura áankú ajasmatai nu tsawantai nui kintiamprarmiai.

<sup>40</sup>Juanka chichamen antukar Jesusan pataatukaruka jímiar ármiai. Chikichik Antresauyayi. Niisha Semun Pitru yachiyayi. <sup>41</sup>Antressha wárik ni yachi Semun kan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkiarat tusa Yus anaikiamuiti.

<sup>42</sup>Nuyá Antres ni yachi Semun kan Jesus pujamunam jukimiai. Jesussha wáiniak tímiayi “Ámetme Semun, Junasa uchirí. Túrusha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

### Jesus Jiripijiai tura Natanaérjai chichasmiania nu

<sup>43</sup>Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup>Jiripisha Petsaitia péprunmayayuyayi. Antressha Pítrusha nu péprunmayayuyayi. <sup>45</sup>Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

<sup>46</sup>Natanaérscha tímiayi “¿Nasarénumia pénger shuar áminkiait?” Jiripisha “Winim ítiá” tímiayi.

<sup>47</sup>Jesussha Natanaéran tíjiuch winian wáiniak tímiayi “Ju shuar iistarum. Ti pénger Israer-shuaraiti. Penké anankartichuiti.”

<sup>48</sup>Natanaérscha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíájme ikiu numirín ejamkam wajamin.”

<sup>49</sup>Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

<sup>50</sup>Tura Jesus tímiayi “¿Aya wi “Ikiu numirín ajamkam wajamin wáinkíájme” takui Winia enentáimturamek? Antsu nuna nankaamas nekaachmin ana nusha wáinkíáttame” tímiayi. <sup>51</sup>Nuyasha Jesus tímiayi “Wi nekas tájarne, Aents Ajasu asan atumsha nayaim uranmianum Yusa suntari Winin tara waka ajainia wáinkíáttarme.” Tu tímiayi.

### Nuatnaikiatin jísat Kaná péprunam ámiania nu

**2** <sup>1</sup>Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. <sup>2</sup>Jesussha ni unuiniamurísha nu nuatnaiyamunam ipiaamu ármiayi.

<sup>3</sup>Umutai amuukamtaí Jesusa nukurí tímiayi “Umutai amuukai. Penké takakainiatsui.”

<sup>4</sup>Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeaatsui.”

<sup>5</sup>Nuyá umutain wáinmainia nuna ni nukurí tímiayi “Ashí ni tana nu umiktárum.”

<sup>6</sup>Nuí kayajají najanamu yumi-yaraataí sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiayi Yus shiir enentáimtursatí tusar. Chíkich chíkich yaraatainiam uchenta (80) rítrusha, sian (100) rítrusha yumi wayamniauyayi.

<sup>7</sup>Nuyá Jesus umutain wáinmaun “Jú yaraataí ámpratarum” tímiayi. Takui mete ámprarmiai. <sup>8</sup>Ámprarmataí Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiai.

<sup>9</sup>Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwátun untsuk <sup>10</sup>tímiayi “Jístanmanka péñker umutain emka suíniatsuk. Tura jémararmatainkia tímianchan suiniatsuk. Túrusha ámeke péñker umutai ikiusam yamáí jíikchamek” tímiayi.

<sup>11</sup>Jesus túramu Kananum Kariréa nunkanam túrunamiayi. Nújainkia Jesus emka ni kakarmarín paant iniaktusmiayi. Nuna íisar ni unuiniamurísha Nin enentáimtusarmiai.

<sup>12</sup>Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiai. Nuísha untsurí tsawant pujusarmiai.

### Yusa Uunt Jeen suruktinian Jesus surimkiamiania nu (Mat. 21.12-13; Mar. 11.15-18; Ruk. 19.45-46)

<sup>13</sup>Israer-shuara namperi, paskua tutai, ishichik ajasmataí Jesus Jerusarénum wémiayi. <sup>14</sup>Nuí jeá Yusa Uunt Jeen súruinian

wáinkíamiayi. Turuncha murikniasha yampitsnasha súrin ármiai. Chikichcha ni misarín pujusar kuítian yapajñiancha wáinkíamiayi.

<sup>15</sup>Nuna wáiniak yarañken chapikmar asutkiartutain najana nujai ashí waakartiuk murikrintiuk aa jíirmiayi. Kuítian yapajniu misaríncha ayantar ni kuítrin nunká utsañkarmiayi. <sup>16</sup>Yampitsan súrinniasha tímiayi “Nuka juyá jíítiarum. Winia Aparu Jeen surutai jea najanawairap” tímiayi.

<sup>17</sup>Nuna ísar ni unuiniamurí yaunchu Yus-Papinium áarman enentáimprarmiayi. Ju áarmaiti:

“Ame Jeem shiir atí tusan ti wakerukuitjai.”

<sup>18</sup>Nuikia Israer-shuara uuntri Jesús aniasarmiayi “Juna túramnaitjai tusam ¿warí kakarmak iniakmastatam?”

<sup>19</sup>Jesussha tímiayi “Ju Jea sáñkiakrumin menaintiú tsawantái iniantaittiai Wikia.”

<sup>20</sup>Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantái jeamtámeash.” <sup>21</sup>Kame Jesus “Jea” chichayat ni ayashín tímiayi. <sup>22</sup>Tuma asamtai Jesús ukunam jakamunmayá nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

### Jesus ashí shuara enentáin nékawai

<sup>23</sup>Paskua námpertin ti untsurí Jerusarénum pujuarmia nu, Jesús aents tujintiamun túramtai, nuna wáinkiar Nin nekas enentáimtusarmiayi.

<sup>24</sup>Tuma ain Jesús ashí neka asa ninkia enentáimtuscharmiai. <sup>25</sup>Niniki ashí shuara enentáin neka asa chíkich ujatkat tusa atsumchamiai.

### Jesus Nikiutémujai

**3** <sup>1</sup>Shuar ámiayi ni naari Nikiutému. Niisha Pariséu asa nii tuinia áintsañ Yúsnan takauyayi. Niisha Israer-shuara uuntriayi. <sup>2</sup>Niisha kashi Jesusai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

<sup>3</sup>Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

<sup>4</sup>Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

<sup>5</sup>Ataksha Jesús tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. <sup>6</sup>Ayashniumiá akiinia nuka ayashchakait. Núnisan Wakanniumiá akiinia nuka wanchakait. <sup>7</sup>Wi “atak yamaram akiiniatniuiti” takui itiurchat enentáimpraip. <sup>8</sup>Nase enentáimpratá. Nase

nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniúmiá akiinia nu.”

<sup>9</sup>Tuma asamtai Nikiutémusha atak anias “¿Jusha itiurak áminiait?” tímiayi.

<sup>10</sup>Jesus áikmiayi “Ame Israer-shuara jintinniuríntiatmesha ¿itiura nékatsmea? <sup>11</sup>Ti nekasan tájame. Nekas nékatur chichajai. Ísmajnia nusha ujaaji. Tuma ain ii chichame ántatsrume. <sup>12</sup>Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktaram?”

<sup>13</sup>‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai. <sup>14</sup>Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakuí tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. <sup>15</sup>Nújajinkia ashí Winia enentáimturna nuka jinium wétsuk Yusaj tuke iwiaaku pujustatui.”

#### Yuska ashí shuaran ti aneawai

<sup>16</sup>Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. <sup>17</sup>Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

<sup>18</sup>Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. <sup>19</sup>Yusa Uchirí tsáapninia áintsan ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritnium wakeriarmai. Nuna tura ásar jinium surunkaruíti. <sup>20</sup>Ashí tunaan túruinia nuka tsáapninian mujjiainiawai. Túrawar yupitainiawai ni tunáa túramu paant ajasaj tusa. <sup>21</sup>Antsu ashí nekas túratnium umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

#### Imiakratin Juan ataksha Jesusnan chichasmiania nu

<sup>22</sup>Nuyá Jesussha ni unuiniamurijjajisha Jutía nunkanam wear nuí pujusar imiakratiarmiayi. <sup>23</sup>Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi. <sup>24</sup>Nusha Juánkan sepunam enkenatsain túrunamiayi.

<sup>25</sup>Tura Juánka unuiniamuri Israer-shuarjai jianaiktinian nan kamawarmiayi. “¿Ya imiakratma imiá péñkerait?” tusar áujmatiarmiayi. <sup>26</sup>Juánkai inintrustai

tusar wéarmiayi. “Uunta, ame nuik Jurtaṅ entsa amain pujakum shuar nuṅ pujá “núiti Yusa Murikriṅ” tíchamkum. Yamaikia imiakratui tura ashí shuar Nin nemarainiawai” tiarmiayi.

<sup>27</sup>Tutai Juanṅ tímiayi “Ashí kakarmaka aya Yúsaiyānchakait. <sup>28</sup>Wisha paant tímiyai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. <sup>29</sup>Kame shuar nuwan nuatna nuna áishrinti. Nuatnaiyak áishmanṅ nuwejai áujnainiakui, ni amikriṅsha nuna antuk ti waraatsuk. Wisha núnisnak aents Jesusaṅ wénaku ti warajai. <sup>30</sup>Niisha tuke nankaamaku uunt ajastiniaiti antsu wikia tuke tímiyancha ajastiniaitjai.” Juanṅ tu chichasmiayi.

### Nayaimpinmayaṅ tara nu

<sup>31</sup>Nayaimpinmayaṅ tara nuka ashí nankaamakuiti. Nunṅkayaṅ nuka, nunṅkayaṅ asa jú nunṅkanmayānak áujmatui. Nayaimpinmayaṅ tara nuka ashí nankaamakuiti <sup>32</sup>tura nuṅ antukmancha íismancha áujmatui. Túrasha ni chichamenṅ ántuiniatsui. <sup>33</sup>Antsu ni chichamenṅ ántana nuka “Yusa chichameṅ imiá nekasaiti” tawai. <sup>34</sup>Yus akupkamuka Yusa chichamenṅ étserui. Yuska ni Wakanṅ ementutsuk susa asamtai tu étserui. <sup>35</sup>Yus Apa ni Uchirṅ anea asa ashí ana nuna iistí tusa ataksaiti. <sup>36</sup>Shuar Yusa Uchirṅ enentáimta nuka yamaram iwiaakmanum akiinia asa tuke Yusaiṅ shiir pujustiniaiti. Antsu Yusa Uchirṅ enentáimtatsna nuka nu iwiaakmanum akiiniachuiti antsu Yus tuke nin kajerkaiti.

### Jesus Samaria nunṅkanmayaṅ nuwajaiṅ chichasmiania nu

**4** <sup>1</sup>“Jesus untsurí shuaran ni nemarkin awajeawai; kame Juanṅjaiṅ nankaamas untsurí imiaawai” taman Pariseu shuar antukarmiayi. <sup>2</sup>Nekaska Jesus imiakratchamiayi, antsu ni unuiniamurí túrawarmiayi. <sup>3</sup>Pariséu nu chichaman antukarman Jesussha nekáa Jutía nunṅkanmayaṅ jiiinki Kariréa nunṅkanam waketkimiayi.

<sup>4</sup>Wáketuk Samaria nunṅkanmaanṅ nankaamaktiniuyayi. <sup>5</sup>Samaria nunṅkanam wéak Sekar péprunam jeamiayi. Nu pepru jeastatuk Jakupa nunṅke ámiayi. Jakupsha nu nunṅkan ni uchirṅ Jusén tí yaunchu susamiayi. <sup>6</sup>Nuisha yumirmat ámiayi. Jakup taurma asamtai “Jakupa yumirmatriṅ” tiarmiayi. Tutupin jeamtai Jesussha pimpiki winis yumirmat ayamach pujusmiayi. <sup>7</sup>Nuṅ pujaiṅ Samarianmayaṅ nuwá yumí shikiktajtsa támiayi. Tura Jesus “Entsa surusta” tímiayi. <sup>8</sup>Jesusa unuiniamurisha yurumkan péprunam sumaktajtsa wéaru asamtai aya Jesusak pujumiayi.

<sup>9</sup>Samarianmayaṅ nuwá Jesusan tímiayi “¿Itiura Israer-shuaraitatmesha Samarianmayaṅ nuwá áisha entsa seatam?” Kame Israer-shuar Samarianmayaṅ shuarjainkia penṅké chichachu ásar nuna tímiayi.

<sup>10</sup>Jesussha tímiayi “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasantjai.”

<sup>11</sup>Nuwasha tímiayi “Uunta, entsasha ti initiaiti tura shikiktincha takaktsume. ¿Tuyan iwiaaku entsasha surustam? <sup>12</sup>Ii uuntri Jakup ju yumirmatan taur juyanaki niisha ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjai nankaamas kakarmakaitiam?”

<sup>13</sup>Jesussha tímiayi “Ashí shuar ju entsan umarka ataksha kitiamtiatui. <sup>14</sup>Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

<sup>15</sup>Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura ju entsancha shikiktinian táchataj” tímiayi.

<sup>16</sup>Nuyasha Jesus tímiayi “Áishrum untsukam utitia, turam juí tatá.”

<sup>17</sup>Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. <sup>18</sup>Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

<sup>19</sup>Nuna antuk nuwasha tímiayi “Uunta, ame Yúsnan etserniuchukaitiam. <sup>20</sup>Ii úntriníki tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

<sup>21</sup>Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. <sup>22</sup>Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. <sup>23</sup>Tsawant winittiana nu yamáí jeayi. Ashí shuar Yus Apan nekas tikishmatainiakka tuke wakanjai tuke enentáijiaisha awajitsuk tikishmatrartatui. Núnisan tikishmatrurat tusa wakerawai Yus Apa. <sup>24</sup>Yuska Wakaniiti tura ashí Nin tikishmatainia nuka tuke wakanjijai tura tuke enentáijiai awajitsuk tikishmatratin ániawai.”

<sup>25</sup>Nuwasha tímiayi “Anaikiamua nu tátiniaiti. Nusha Krístuítui. Niisha taa ashí jintinramattaji.”

<sup>26</sup>Jesus tímiayi “Wiitjai. Ámin chichaaajmena nú Krístuítjai.”

<sup>27</sup>Nuin ni unuiniamurí táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaaam?” títinian arantukarmiayi. <sup>28</sup>Nuyanka nuwá ni yumirin ikiuki péprunam we ashí áentsun tímiayi <sup>29</sup>“Winiirum ítiarum, shuar ashí wí túramun túruta nu. ¿Juka Krístuittiya?” <sup>30</sup>Tutai péprunmayá jíinkiar Jesus pujamunam wearmiayi.

<sup>31</sup>Jeainiatsajin ni unuiniamurí seak tiarmiayi “Uunta, yurumáta.”

<sup>32</sup>Tura Jesus tímiayi “Wi yúatniunka takakjai átum nékachman.”

<sup>33</sup>Ni unuiniamurísha nuámtak anniasarmiayi “¿Chíkích shuar yurumak itiarím tátsuash?” tiarmiayi.



<sup>34</sup>Tura Jesus tímiayi “Winia akuptukua nuna wakeramurí túrakun tura ni takatrín takaakun Wíjiaínkia yurumátniua áintsan̄ ikiakáatui. <sup>35</sup>Átumka “Tuke kuaru nantu árak júuktin taasai” tátsurmek. Túrasa Wi tájarne, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. <sup>36</sup>Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. <sup>37</sup>Tiniu armia nuka nekasaiti: “Chikichik arawai chíkichcha júawai.” <sup>38</sup>Iis, chíkich arakmamu júuktinian akupkaitjarne. Átum araachiatrumek chíkich takasmanum atumsha pachíintiukuitrume” tímiayi.

<sup>39</sup>Tura núwaka péprunam jeá “Ashí wi túramun ujat kayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiai. <sup>40</sup>Nu asamtai ashí Jesusaí taar niijiaí pujusát tusa seawarmiayi. Tutai Jesus jimiará tsawant nuí pujusmiayi. <sup>41</sup>Nú shuar untsurí ni chichamen̄ antukar Jesusan ti shiir enentáimturarmiayi. <sup>42</sup>Nuyá nuwan tiarmiayi “Yamaikia aya ame chichammijiaín Jesus enentáimtatsji antsu imia iisha ni chichamen̄ anturkaji. Tura nékaji nekas Krístuiti, ashí shuaran Uwemtikin.”

#### **Jesus akupniu takarniurí uchirín tsuármiania nu**

<sup>43</sup>Jimiará tsawant nankaamasmatai Jesus Samaria nunkanmaya jiinki Kariréa nunkanam wémiayi. <sup>44</sup>Kariréasha Jesusa nunke asamtai, aínsha Jesus timia áintsan̄ ámiayi: “Yúsnan etserniun ashí shuar péñker anturainiawai antsu nuna nunkeyanka nin anturainiatsui.” <sup>45</sup>Tuma ain̄ Kariréa nunkanam jeamtai auya shuarsha Jerusarénum paskua námpernum wearu ásar tura ashí ni túramun nuí wainkia ásar ti shiir awajsarmiayi.

<sup>46</sup>Nuyá Jesus Kaná péprunam atak támiayi. Nu péprunmasha nuik Jesus yumin umutai awajsarmiayi. Jesussha nuí pujai yajá péprunam Kapernáumnum akupniu takarín ámiayi. Ni uchirísha jaa tepemiayi. <sup>47</sup>Niisha Jesus Jutíanmaya Kariréa nunkanam taman antuk Jesusaí wémiayi. Tura ni uchirí jákatin tepakui ni jeen we ni uchirín tsuarat tusa Jesusan searmiayi.

<sup>48</sup>Jesussha tímiayi “Aya aents túrachminian túrakui ísrum aya nújain̄ Winia enentáimtarme.”

<sup>49</sup>Tura takarín tímiayi “Uunta, winia uchir jáatsain̄ wari winitia.”

<sup>50</sup>Nuínkia Jesus tímiayi “Jeemiin̄ waketkitia. Yamaikia ame uchiram péñker ajasai.” Tutai nú aishman̄ Jesus táman antuk wémiayi.

<sup>51</sup>Ni jeen jeátemámtai ni takarniurí inkiun̄ tiarmiayi “Yamaikia uchiram péñker ajasai.”

<sup>52</sup>Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntamtai, tsuemun michatramai” tiarmiayi.

Nuna antuk uchí aparísha enentáimsamai. <sup>53</sup>Nantu pukunta ai Jesus “Ame uchiram pénker ajasai” timia nuní ain michatraití. Tuma asamtai niisha ashí ni shuarísha Jesusan nekas enentáimturarmiyai.

<sup>54</sup>Jesus nu túramujai ni kakarmarín jimiará iniakmasmiyai. Nunasha Jutíanmaja jiiñki Kariréa nunkanam jeá túramiyai.

### Petesta amia nuí tampemarun Jesus tsuármiania nu

**5** <sup>1</sup>Nu nankaasmatai, Israer-shuar namperan najanainiakui Jesus ataksha Jerusarénnum waketkimiya. <sup>2</sup>Jerusarén yama wayamunam murik wayatin waiti tíjiuch amia nuí entsa pajamtai jeammauyai. Nu pajamtain Petesta tiarmiayi. Nuna wáitirísha senku (5) ármiai. <sup>3</sup>Nuí untsurí jáiniak nunkanam tepearmiayi. Kusurusha shutuapsha tampemakusha tepesar entsa miartukat tusa nákasarmiyai. <sup>4</sup>Kame ni tátaj taku Yusa suntari táuyai entsan umuchkiattsá. Nuyanka emka shuar entsá wayá nu ni jáamuriya tsuármarmiyai. <sup>5</sup>Áishman traintiúchu (38) uwi jaa tepá nuí ámiyai.

<sup>6</sup>Jesussha nu shuaran nuí tepan wáinkiaímiyai. Tura untsurí uwitin jaa tepan nekáa aniasmiyai “¿Shiir ajastiniak wakeram?”

<sup>7</sup>Tutai jaasha tímiyai “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

<sup>8</sup>Nuyá Jesus tímiyai “Nantaktia. Ame peakrum jukim wetá.”

<sup>9</sup>Nu chichamtaik áishman shiir ajasmiyai. Tura ni peakrín jukí wémiyai. Nusha ayampratin tsawantaj túrunamiyai. <sup>10</sup>Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

<sup>11</sup>Áishmansha tímiyai “Winia tsuara nu “Peakrum jukim wetá” turutni” tímiyai.

<sup>12</sup>Nuñkia aniasarmiyai “¿Ya “Peakrum jukim wetá” túramam?” tiarmiayi. <sup>13</sup>Tura áishmansha Nin tsuárun nékachmiyai. Untsurí shuar nuí aa asamtai tura Jesus weu asamtai nin nekaachmiyai.

<sup>14</sup>Atak Jesus Yusa Uunt Jeeñ áishmankan wáiniak tímiyai “Antukta. Yamaikia shiir ajasume. Atak tunáa túrawaip; nu arant ajasáim” tímiyai.

<sup>15</sup>Nuñkia áishman Jesus nin tsuárman nekáa Israer-shuaran ujakmiyai.

<sup>16</sup>Tuma asamtai ayampratin tsawantaj túramtai Israer-shuar Jesusan maatai tusar áintrarmiyai. <sup>17</sup>Tura Jesus tímiyai “Wina Apar tuke yamaisha takawiti. Núnisnak Wisha takaajai.” <sup>18</sup>Tutai Israer-shuar nuna nankaamas maatai tusa wakeriarmiyai. Ayampratin tsawantaj takaakui kajerarmiyai. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerarmiyai.

### Yusa Uchirí túramnia nu

<sup>19</sup>Nuyá Jesus tímiyai “Ti nekas tájarme, Yusa Uchiríñkia ni enentáijjain takaatsui. Antsu aya winia Apar takaana nuna ísan métek takaajai.

Ashí winia Apar túramun Wissha ni Uchirí asan métek takaajai. <sup>20</sup>Ni Uchirí asantai winia Apar anentui tura ashí tura nuna iniakturui. Tura nuna nan̄kaamas tujinkiamnian iniaktursattawai Wissha túratniun. Tura nuna túrakui ashamkattarme. <sup>21</sup>Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai. <sup>22</sup>Winia Aparka súmamtiktsui antsu shuar súmamtikiatniun ni Uchirín súsaiti. <sup>23</sup>Tuma asantai ashí shuar Yus Apan shiir awajainia áintsan̄ ni Uchiríncha métek shiir awajsatin ániawai. Yus Apa ni Uchirín akupka asantai, Uchin shiir awajeatsna nuka Yus Apancha shiir awajeatsui' tímiayi.

<sup>24</sup>'Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin̄ tuke amuukashtinian takakui. Nu shuarsha ayashí iwiaakuitiat jákauyi antsu yamáí nekas iwiaakuiti. Tuma asa sumamashtatui. <sup>25</sup>Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui. <sup>26</sup>Iis, winia Apar iwiaaku awajsatniun takakui. Tura Winiasha, ni Uchirí asantai, iwiaaku awajsatniun surusuiti. <sup>27</sup>Nu arantcha wi Aents Ajasu asantai, shuaran súmamtikiatniun surusuiti. <sup>28</sup>"Ju chicham itirchataiti" enentáimprairap. Atak tsawantai wi unsumman ashí jákaru ainia nu antukartatui. <sup>29</sup>Tura ashí iwiansamunmayá jínkiartatui. Pénker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui' tímiayi.

### "Jesus nekas Yúsaiyáiti" tu áujmatainia nu

<sup>30</sup>'Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asantai, awajitsuk súmamtikjai. <sup>31</sup>Aya Wiki "Yúsaiyáitjai" tákunka winia chichamur ántar ainti. <sup>32</sup>Chikichcha awai. Niisha "Yúsaiyáiti" túrutui. Ni chichamesha imiá nekasaiti. <sup>33</sup>Atumsha Juan̄kai wi túramu inintrusmarme tura nii timia nu nekasaiti. <sup>34</sup>Tuma ain̄ aents táman atsumatsjai. Antsu Juan̄ka chichame enentáimkiuram uwempratarum tusan tájarme. <sup>35</sup>Juan̄sha jiya núnis keemai. Atumsha ishichik tsawantin nú tsáapninnium warastin enentáimprarmarme. <sup>36</sup>Tura Winia "Yúsaiyáiti" túrutna nu, Juan̄jai nan̄kaamas pénkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. <sup>37</sup>Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume. <sup>38</sup>Yus Apa akuptukuiti. Tuma asantai Winia enentáimturhakrum winia Aparu chichamesha atumi enentáin wayachuiti. <sup>39</sup>Átumka Yus-Chicham yaunchu aarma nu iwiaaku átinian wáinkiataj tusarum ti unuimiaruitrume. Nu chichamsha Wínian

ájumtúi. <sup>40</sup>Tuma ain̄ nekas iwiaaku átaj tusarum Winí tátin nakitiarme” tímiayi.

<sup>41</sup>“Shuar Winia “shíiraiti” túrutainiakuisa nuna páchiatsjai. <sup>42</sup>Maa, Wi nékajrume. Átumka Yus aneatsrume. <sup>43</sup>Winia Apar akuptukmatai táwitjai túrasha nakitrarme. Antsu chíkichka ní enentájjiāin̄ jeartamkūn̄kia nuka átum wakerarme. <sup>44</sup>Átumka nuám̄tak “Shiir enentáim̄tursatí” tu enentáim̄tunaiyarme. Tura Yus enentáim̄turma nuka páchiatsrume. Nújjain̄kia çitiurak Yus enentáim̄tustam? <sup>45</sup>“Ii tunaar̄in̄ Yusaj̄ etserturmaktatji” turutiirap. “Muisais akupkamun umirkan uwemprattajai” táturmek. Antsu Muisais aarma nujaj̄ atumí tunaar̄i etsernaktatui. <sup>46</sup>Iis, Muisais Winia áatrurmiayi. Atumsha ni timia enentáim̄takrumka Winiasha enentáim̄turaintrume. <sup>47</sup>Tura ni aarma enentáim̄tachkurmeka çitiurak wi tama enentáim̄tustarum?” tímiayi Jesus.

**Jesus senku mir (5.000) áishman̄kan ayurawarmiania nu**  
(*Mat. 14.13-21; Mar. 6.30-44; Ruk. 9.10-17*)

**6** <sup>1</sup>Nu nan̄kaasmatai Jesus Kariréa antumiān̄num amain katīn̄miayi. Nu antumiān̄sha Tipirias antumiān̄ tuiniawai. Jimiará náartiniaiti. <sup>2</sup>Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. <sup>3-4</sup>Israer-shuara paskuanamper̄i ishichik ajasmatai Jesussha ni unuiniamur̄ijaj̄ náinnium waka nūi pujusmiayi. <sup>5</sup>Jesussha untsurí aents wininian wáiniak Jiripin tímiayi “Timiá untsurí shuar ayuratniusha çtuyan̄ yurumak sumaktaj?” tímiayi. <sup>6</sup>Kame Jesuska Nii túrattana nuna neka asa Jiripi warittin̄ tusa tímiayi.

<sup>7</sup>Jiripisha nuyá tímiayi “Timiá nukap kuitjaj̄ tanta sumakmesha ashí ishichik susamsha jeachaintjiā” tímiayi.

<sup>8</sup>Nuyá chíkich unuiniamur̄i Antres, Pitru yachi, tímiayi <sup>9</sup>“Uchi jūi sen̄ku (5) tantan jimiara namakjaj̄ takakui. Ausha timiá untsur̄in̄masha jeatpiash” tímiayi.

<sup>10</sup>Nuyanka ““Ashí pujustarum” titiarum” tímiayi Jesus.

Áishman̄sha nuwasha uchisha irunmiayi. Tura chírichri núkap aa asamtai nūisha sen̄ku mir (5.000) áishman̄ pujusarmiayi. <sup>11</sup>Jesussha nu tantan achik Yúsán yumīnkias ni unuiniamur̄in̄ susamiayi. Niisha ashí nūi pujuinian súsar̄miayi. Namaknasha núnisan̄ ashí ni wakeriarmiania nuna súsar̄miayi.

<sup>12</sup>Jémararmataisha Jesus ni unuiniamur̄in̄ tímiayi “Ampirma júukrum chānkinnium chumpiatarum. Wasúr̄nákaj̄in̄.” <sup>13</sup>Niisha sen̄ku (5) tantanmaya ampirman júukar tuse (12) chānkinnium áimkiarmiayi.

<sup>14</sup>Nu shuarsha Jesus túramun ísar tiarmiayi “Jūi nekas Yúsnan etserin tátinia núchakait.” <sup>15</sup>Shuar Jesusan uunt akupin awajsataj tutai Jesus nekáa Nīnki náinnium wémiayi.

**Jesus entsá pátatek nanamas wekasamiania nu**  
(*Mat. 14.22-27; Mar. 6.45-52*)

<sup>16</sup>Kíakui Jesusa unuiniamurí antumiannum wearmiayi. <sup>17</sup>Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi. <sup>18</sup>Tura nase ti umpúakui chíchimi ti wajaimiayi. <sup>19</sup>Ajapén ajasar Jesus entsá pátatek nanamas tíjiuch winian wáinkiar ashamkarmiayi. <sup>20</sup>Tura Jesus “Wiitjai. Ashamprukairap” tímiayi. <sup>21</sup>Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

**Shuar Jesusan eak wekainiawai**

<sup>22</sup>Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujaí wéarun nekaawarmai. <sup>23</sup>Nuì chichak matsataí Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai <sup>24</sup>nu shuar, Jesussha ni unuiniamurísha nuì atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

**Jesus apatkua áintsankete**

<sup>25</sup>Entsa amain Jesusan wáinkiar aniasarmiayi “Uunta, ¿urutía juísha támam?”

<sup>26</sup>Jesussha tímiayi “Ti nekas tájarme. Aents tujintiamu nekáa asarum éatsurme. Antsu tanta yuarum jémaru asarum éatrume. <sup>27</sup>Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

<sup>28</sup>Tutai inintrusarmiayi “¿Warí túratniuitiaí Yus wakerana nu umiktin?”

<sup>29</sup>Jesussha tímiayi “Yus akupta asa Winia enentáimtursarat tusa wakerawai.”

<sup>30</sup>Tutai aniasarmiayi “¿Aentsti tujintiamuka warí túrattam ii físar Ámin nekas enentáimtustin? Chikichcha túratá. <sup>31</sup>Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

<sup>32</sup>Jesussha tímiayi “Wi tájana nu nekasaiti. Muisais atumí úntrin nayaimpinmaya yurumkan súsachmiayi. Antsu winia Apar yamáí nekas apatkun nayaimpinmaya súramui. <sup>33</sup>Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

<sup>34</sup>Tutai “Uunta, nu apatuk tuke amasta” tiarmiayi.

<sup>35</sup>Tura Jesussha tímiayi “Wíitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. <sup>36</sup>Túrasha wi túramu wáinkiuermesha winia chichamur enentáimtatsrume. <sup>37</sup>Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashtatjai. <sup>38</sup>Wi wakeraj nuna túratniun táchaitjai antsu Winia akuptukmia nuna umirkatniun táwitjai. <sup>39</sup>Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. <sup>40</sup>Yus Apa wakerana nu júiti. Ashí shuar Winia “Yusa Uchirinti” tu enentáimturkuí yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

<sup>41</sup>Tura Jesus “Wíitjai, nayaimpinmaya apatuk akupkamu” takui Israer-shuar Jesusan áujmatiarimiayi.

<sup>42</sup>Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

<sup>43</sup>Jesussha tímiayi “Tu áujmatrukairap. <sup>44</sup>Shuáran winia Apar akúpturkachuitkiuinikia penké weanturkachainti. Tura Winia akupturna nuna amuukatin tsawantaj iniántkíttiajai. <sup>45</sup>Yúsnan etserniu áarmarın tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí táiniawai’ tímiayi.

<sup>46</sup>‘Aya Wiki Yúsaiya tau asan Yusan wáinkiaitjai. Chíkichka penké wáinkiachuiti. <sup>47</sup>Ti nekas tájarme. Winia enentáimturna nú shuarka yamaram iwiaakman amuukashtinian takakui. <sup>48</sup>Wikia iwiaakman súana nú apatkuitjai. <sup>49</sup>Iis, atumí uuntri aents atsamunam maná yurumkan yúawariatcha ashí jákarmiayi. <sup>50</sup>Antsu Wi tájana nú apatkun shuar yúakka jákachartatui. <sup>51</sup>Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

<sup>52</sup>Nuyá nuámtak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

<sup>53</sup>Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. <sup>54</sup>Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkíttiajai. <sup>55</sup>Winia ayashruka nekas yurumkaiti tura winia numparsha nekas umutainti. <sup>56</sup>Winia ayashruncha yúaka tura winia numparnasha úmaka Wijijai tsanin pujawai tura Wisha nu shuarjai tsaninkian pujajai. <sup>57</sup>Yus Apa, Winia akuptukuka, nu iwiaakma nérenniuiti. Tuma asamtai

ni iwiaakmariin iwiaaku pujajai. Núnisan Winia yurakka winia iwiaakmarui iwiaaku pujustatui. <sup>58</sup>Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. <sup>59</sup>Núnaka Jesus Israer-shuar iruntainiam ununiarmiayi.

### Iwiaaku chicham

<sup>60</sup>Nu chichaman antukar Jesusa ununiamuri chicharainiak “Nii tana nu ti itiurchat asamtai ¿yaki antukminiait?” tiarmiayi.

<sup>61</sup>Jesussha ni áujmatman nekáa tímiayi “Átum “ju chicham itiurchataiti” tárumek. <sup>62</sup>Wátsek, Wi nayaimpiniam pujumiaj nui waketkimtaisha ¿urukawaintrumek? <sup>63</sup>Warí, aya wakanik iwiaakman súwaiti. Ayashkia penké áantraiiti nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. <sup>64</sup>Tura Jesus Nin enentáimtachun tura Nin suruktatna nunasha yaunchu neka asa ni ununiamurin tímiayi “Atumincha winia chichamprun enentáimtachu tuke awai. <sup>65</sup>Nu asamtai tímiajrume “Shuáran winia Apar akupturkachmaitkiuinkia penké weanturkachainti” tímiajai” tímiayi Jesus.

<sup>66</sup>Nuyasha ni nemarniuri untsuri armia nu Jesusan ikiukiar atakka Nijiai wekasacharmiayi. <sup>67</sup>Nuyá Jesus ni tuse (12) ununiamurin chicharainiak “¿Atumsha wétin wakerarmek?” tímiayi.

<sup>68</sup>Semun Pítrusha áikmiayi “Uunta, ¿yáinin wetaj? Ame chichammijiain nekas iwiaaku áminiaiti. <sup>69</sup>Ame Kristu asam nekas iwiaaku Yusa Uchirinme. Nuka enentáimtusar ti paant nékaji” tímiayi.

<sup>70</sup>Jesussha tímiayi “Ashí tuse (12) árumna nu achikiuitjarme nekas Wíi shuar ajastin. Tuma ain atumin chikichik iwianchiiti” tímiayi. <sup>71</sup>Nuna taku Jútas Iskariúin, Semunka uchirin, enentáimtus tímiayi. Jútassha ni ununiamurintat Jesusan ukunam surukmiayi.

### Jesusa yachisha Nin enentáimtuscharmiai

**7** <sup>1</sup>Nu nankaamasmatai Jesus Kariréa nunkanam wekaimiai. Jutía nunkanam wéchamiayi Israer-shuara uuntri nui máataj tutai.

<sup>2</sup>Tura Israer-shuar aak aakmatai namperii jeatemamtai <sup>3</sup>Jesusa yachi wishikiainiak tiarmiayi “¿Urukamtai juisha pujam? Jutía nunkanam wetá, aisha ame ununiamuram túram nuna ísarat. <sup>4</sup>Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi. <sup>5</sup>Ni yachisha ishichkisha Nin enentáimtachu ásar tiarmiayi.

<sup>6</sup>Tura Jesus tímiayi “Winia tsawantur nampernum wétin jeatsui. Atumjainkia nánkas tsawant wétin pénkeraiti. <sup>7</sup>Ju nunkanmaya aents

atumniaka kajertamatsume. Antsu ni tunaarin etsertin asamtai Wíniaka kajertuiniawai. <sup>8</sup>Átumka nampernum wetarum. Wikia tsawantur jeachkui wéatsjai.” <sup>9</sup>Juna tinia Jesuska Kariréa nunkanam juákmiai.

### Aak aakmatai nampernum Jesus timia nu

<sup>10</sup>Ni yachi wearmatai Jesussha nampernum wémiayi. Tura nekarawarain tusa úumak wémiayi. <sup>11</sup>Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi. <sup>12</sup>Ashí shuarsha Nin áujmatiarmiayi. Chíkich “pénkeraiti” tiarmiayi. Tura chikichcha “Pénkerchaiti. Aya anankartawai” tiarmiayi. <sup>13</sup>Tura Israer-shuara úuntrin ashamainiak uuk áujmatiarmiayi.

<sup>14</sup>Nampersha ajapén ajasmatai Jesus Yusa Uunt Jeen wayá shuáran unuiniamiayi. <sup>15</sup>Israer-shuara úuntrisha nuna ísar ti enentáimsar chichaak “Jusha unuimíatrachiatcha ¿itiurak imiá neka?” tiarmiayi.

<sup>16</sup>Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai. <sup>17</sup>Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaitkiuñkia, nuna nekaattawai. Aya wi enentáimmiajain chichaakuisha, nuna nekaattawai. <sup>18</sup>Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. <sup>19</sup>Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

<sup>20</sup>Nu shuarsha tiarmiayi “Wáurtsumek. ¿Ya mantamataj tusa wakera?”

<sup>21</sup>Jesussha tímiayi “Ayampratin tsawantai chikichkí túramtai ti enentáimtsumek. <sup>22</sup>Muisais ashí tsupirnaktinian akupkachmiayi. Antsu ni uuntrinkia nuna akupka áiniawai. Tuma ain átumka Muisais akupkamu umiktai tusarum ayampratin tsawantaisha uchi áishmanñ tsúpirnaitrume. <sup>23</sup>Wátsek, Muisais akupkamu uminkiatu tusarum ayampratin tsawantaisha uchi áishmanñ tsúpirkurmekaka ¿urukamtai Wi ayampratin tsawantai áishmanka ayashí takamtsuk tsuármatai kajertarum? <sup>24</sup>Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

### Jesus Yúsnumia akupkamuiti

<sup>25</sup>Nuyá Jerusarénnumia shuar tiarmiayi “Maatai tuinia núchakait. <sup>26</sup>Tura nui ashí ántamunam étserui tura suntar páchiniatsui. ¿Ii uuntrisha “Nekas Krístuiti” tu enentáimtuiniawash? <sup>27</sup>Antsu nekas Kristu taa tuyan winiá nekanashtatui tura juñ pujamuka ashí nékaji” tiarmiayi.

<sup>28</sup>Jesus nuna antuk, Yusa Uunt Jeen wajá kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar



akuptukuiti. Niisha ti nekas akupniusha átumka nékatsrume. <sup>29</sup>Antsu Winia akuptukuitkiui aiya tau asan Wikia nékajai” tímiayi. <sup>30</sup>Nuyá sepunam enkeataj táyat achikcharmiayi ni tsawantri jeachu asamtai. <sup>31</sup>Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

#### “Eátkáttarme tura wáitkiashtatrume” tímiayi Jesus

<sup>32</sup>Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar. <sup>33</sup>Nuyá Jessusha tímiayi “Aya ishichik tsawant atumjají pujustataj. Nuyá ataksha Winia akuptuku pujana nuí waketkittiajai. <sup>34</sup>Átumka eátkáttarme tura Wi wéajna nuí wéchamniaitkiuram wáitkiashtatrume.”

<sup>35</sup>Israer-shuarsha nuamtak aniniaisarmiayi “¿Jusha tuí wéakuin iisha wáinkiashtataj<sup>i</sup>. Israer-shuar apachnium pujuinia nuí we apachin ununiartatuak. <sup>36</sup>Nii timia nu iturkit. “Átumka eátkáttarme tura Wi wéajna nuí wéchamniaitkiuram wáitkiashtatrume” tana nu iturkit?” tiarmiayi.

#### Yamaram iwiaakman súana nú entsa

<sup>37</sup>Jista amúamunam ti shiir najanawarmia nu tsawantaj Jesus wajakí kakaram chichaak tímiayi “Shuar ni enentáin kitiamakka Winin taa umar kitiakén imíkrátí. <sup>38</sup>Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

<sup>39</sup>Nuna taku Jesus “Ashí Yúsan enentáimtusarun Yusa Shiir Wakaní súatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súasachmauyayi.

#### Shuarsha niisháa niisháa enentáimprarmiania nu

<sup>40</sup>Chíkich shuarsha nuna antukar “Ju nekas Yúsnan etserin tátinia núiti” tiarmiayi. <sup>41</sup>Chikichcha “Juka nekas Krístuítí” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmayá Kristu áminkiait? <sup>42</sup>Yus-Papinium paant tawai “Krístuka yaunchu uunt akupin Tawit weanmayá akiiniatniuiti, tawai. Tura Tawitia pépruriya Pirinnumia átiniaiti” tawai” tiarmiayi. <sup>43</sup>Tuma asamtai shuar niisháa niisháa enentáimprar kanakiarmiayi. <sup>44</sup>Chíkich aiya nuka “sepunam enkeatai” tiarmiayi túrasha túracharmiayi.

#### Israer-shuara uuntri Jesusan enentáimtuscharmiania nu

<sup>45</sup>Suntarsha waketkiarmiayi. Tura Pariséusha Israer-patri uuntrisha “¿Urukamtai itiachuram?” tiarmiayi.

<sup>46</sup>Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

<sup>47</sup>Nuyá Pariséu tiarmiayi “Atumsha anannarume. <sup>48</sup>Pariséutisha uuntcha nuna enentáimtuiniawash. <sup>49</sup>Penké shuarka yaunchu akupkamun nékachua nuka yajauchiniam yuminkramu ániawai” tiarmiayi.

<sup>50</sup>Nikiutémusha, kashi Jesusan tarimia nu, Pariséuitiat tímiayi <sup>51</sup>“Ii shuartikia, shuar ni túramun etserkamu ántutsuk súmamtikiachminiaiti” tímiayi.

<sup>52</sup>Nuinikia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmaya Yúsnan etserin penké táiniatsui” tiarmiayi.

### Nuwá wáinmakman Jesusan itiararmiania nu

<sup>53</sup>Nuyá ashí ni jeen waketkiarmiayi.

**8** <sup>1</sup>Tura Jesuska Uriwiu náinnium wémiayi. <sup>2</sup>Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. <sup>3</sup>Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi. <sup>4</sup>Tura Jesusan tiarmiayi “Uunta, ju nuwá tsanirma pujá achinkiyai. <sup>5</sup>Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. <sup>6</sup>Aya mamikmar nekapsatai tusar tiarmiayi. Nin sumamtikiatniun wakermiayi.

Nuyá Jesus tsuntsumá ni uwejéjai nunká áarmiayi. <sup>7</sup>Tura tuke iníam wajaki tímiayi “Ayu, atumiya tunáa túrichu ákunka kayan achik nin emka tukuti” tímiayi. <sup>8</sup>Tura nuna ti, ataksha tsuntsumá nunká áimiayi.

<sup>9</sup>Tura ni chichamen antukar ni enentáin sumamawar úntnumia júki chikichik chikichik jiinki wéarmiayi.

Ashí wéarmatai Jesus Niñki nuwájai juákmiayi. <sup>10</sup>Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichkisha áwak?” tímiayi.

<sup>11</sup>Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

### Jesus tsáapnia áintsankete

<sup>12</sup>Ataksha Jesus Yusa Uunt Jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijiai tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

<sup>13</sup>Pariséu nuikia tiarmiayi “Ame péñkerum tau asam támena nu áantrai.”

<sup>14</sup>Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti. <sup>15</sup>Ju

nun<sub>kan</sub>mayá aents enentáim<sub>m</sub>iajái enentáim<sub>t</sub>akrum ti s<sub>u</sub>mam<sub>t</sub>ikrume. Tura Wikia chikich<sub>k</sub>inkesha s<sub>u</sub>mam<sub>t</sub>ikt<sub>s</sub>ujai. <sup>16</sup>Tura s<sub>u</sub>mam<sub>t</sub>ik<sub>k</sub>iunka awajitsuk túrajai. Iis, Wiki shuar túramun pen<sub>ker</sub>ashit tusan enentáim<sub>t</sub>sujai antsu winia Apar Winia akuptukua nusha Wijíai métek shuar túramun nékawai. <sup>17</sup>Atumí akupkamur<sub>i</sub>n áarmaiti: “Jimiará shuar mai nú chichamnak tákuin<sub>k</sub>ia nu chicham nekasaiti.” <sup>18</sup>Wátsek Wisha winia Aparsha mai métek taji. Winia Aparsha akuptukuiti” tímiayi.

<sup>19</sup>Tutai “¿Ame apasha tuj<sub>i</sub> pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” <sup>20</sup>Nuna Yusa Uunt Jeen Yusa kuítr<sub>i</sub>n suinia nu<sub>i</sub> tímiayi. Tuma ain<sub>n</sub> sepunam en<sub>keat</sub>niun achikcharmiayi ni tsawantr<sub>i</sub> jeachu asamtai.

### “Wi wéajna nu<sub>i</sub> wéchamniaitrume’ tímiayi Jesus

<sup>21</sup>Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaar<sub>i</sub>jíai<sub>n</sub> jakattarme.”

<sup>22</sup>Israer-shuarsha tiarmiayi “Wi wéamunam wéchamniaitrume” tutai, nu<sub>n</sub>kia máamatpiash” tiarmiayi.

<sup>23</sup>Nuin<sub>k</sub>ia Jesus tímiayi “Átumka nun<sub>k</sub>ayáit<sub>r</sub>ume antsu Wikia nayaimpinmayaitjai. Ju<sub>n</sub> nun<sub>k</sub>ayáit<sub>r</sub>ume tura Wikia juyanchuitjai. <sup>24</sup>Tuma asamtai tájar<sub>m</sub>e “Atumi tunaar<sub>i</sub>jíai<sub>n</sub> jakattarme.” Nekas Wi tájana núitjai. Tura nu enentáim<sub>t</sub>achkurmeka atumi tunaar<sub>i</sub>jíai<sub>n</sub> jakattarme” tímiayi.

<sup>25</sup>Niisha aniasarmiayi “¿Amesha yáitiam?”

Jesussha tímiayi “Yaunchu tájar<sub>m</sub>e. <sup>26</sup>Nu arantcha atumin s<sub>u</sub>mam<sub>t</sub>ikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. <sup>27</sup>Tuma ain<sub>n</sub> ni Apar<sub>i</sub>n áujmatman pen<sub>ké</sub> nekaacharmiayi. <sup>28</sup>Tuma asamtai tímiayi “Aents Ajasuitjiana ju<sub>n</sub>, numiniam ajintruarum yakí takuriakrumin nújain<sub>k</sub>ia nekarattarme. Wi tájana núitjai tura winia enentáirjain<sub>n</sub> takatsuk aya winia Apar unuitiurmanak tájai. <sup>29</sup>Winia akuptukua nuka tuke Wíjia<sub>n</sub> pujawai. Winia Apar wakeramun tuke shiir túrakui ikiurkichiuiti” tímiayi. <sup>30</sup>Tutai untsur<sub>i</sub> shuar Nin nekas enentáim<sub>t</sub>usarmiayi.

### Yus-shuarsha tura tunaanum emetamusha

<sup>31</sup>Israer-shuaran Nin shiir enentáim<sub>t</sub>usarmia nuna Jesus tímiayi “Wi tájarmena nu yawetsuk túrakrumka nekas winia unuiniamur áatrume. <sup>32</sup>Núja<sub>n</sub>isha timiá nekas ana nu nekaattarme tura nekas an<sub>k</sub>ant ajastatrume” tímiayi.

<sup>33</sup>Niisha tiarmiayi “Iisha Apraám weeitji. Chikicha takarniur átai tusar pen<sub>ké</sub> emetachmaitji. ¿Urukamtai “An<sub>k</sub>ant ajastatrume” tame?” tiarmiayi.

<sup>34</sup>Jesus tímiayi “Tímiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti. <sup>35</sup>Takarniusha ajapnamnia asamtai Yus atumin ajapramamniaitrum. Tura Akupniu Uchirínkia ni Aparíjiaí tuke pujawai. <sup>36</sup>Tuma asamtai Akupniu Uchirí ankant awajitamsamtaínkia imiá nekas ankant pujostatrum. <sup>37</sup>Átum Apraám weeatrum nekejai. Túmaitatrum winia chichamur ántachu asarum mantuataj tárume. <sup>38</sup>Winia Apar iniaktursamun áujmatjai. Átumka atumí uuntri timia túrarme” tímiayi.

<sup>39</sup>Tutai niisha tiarmiayi “Íkia Israer-shuar asakrin ii úuntrinikia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níiya núnis túrawaintrume. <sup>40</sup>Nekas ana nuna Yus iniaktursamtai nuna ujakjarne, tuma aín mantuataj tarume. Apraámka nuní túrachmiayi. <sup>41</sup>Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

<sup>42</sup>Tura Jesus tímiayi “Yus nekas atumí Aparíntkiuinikia Winiasha anentíntrume Yúsnumiá tau asamtai. Wisha winia enentáimmarjai juí táchaitjai antsu Yus akuptukuí. <sup>43</sup>¿Urukamtai Wi tájana nu imiá nekatsum? Wi tájana nu nakitia asarum winia chichamur ántatrum. <sup>44</sup>Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchikia tuke mankartiniaiti. Nekas ana nunasha nakitiawai tuke wáittrin asa. Wáittraksha níniunak chichaawai. Iis, waitia uuntri asa tuke wáittrinaiti. <sup>45</sup>Tura Wikia nekas takuí átum enentáimtursum. <sup>46</sup>¿Yaki chikichkí tunaajai súmamtikruamniait? Nuikia Wi nekasa nuna tau aisha ¿urukamtai enentáimtursum? <sup>47</sup>Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

### Apraám akiintsain Jesus pujumiayi

<sup>48</sup>Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

<sup>49</sup>Jesusha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. <sup>50</sup>Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. <sup>51</sup>Ti nekasaiti. Wi tájana nuna enentáimta nú shuarka penké jákashtiniaiti” tímiayi.

<sup>52</sup>Nuínkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek

tiarmiayi. <sup>53</sup>¿Nuñkia ii uuntri Apraám nan̄kaamaskaitiam. Niisha tura Yúsnan etserniusha jákacharuk áinia. Itiurak imiá nan̄kaamantu enentáimtumam?” tiarmiayi.

<sup>54</sup>Jesussha tímiayi “Wiki shiir enentáimtumaknaka pen̄ké áantraiiti. Antsu Winia shiir enentáimturna nu winia Aparuuti. Nusha átumka “winia Yúsruiti” tárumna núiti. <sup>55</sup>Nusha táyatrum Nin nékatsrume. Wikia Nin nékajai. “Nin nékatsjai” tákunka atumjái métek wáitrin áintjai. Tura Nin neka asan Nii tana nuna tuke túriniaitjai. <sup>56</sup>Apraámka, atumí uuntri, imiá yaunchu jákaiat Wi ju nun̄kanam tátinian wararas nákasmiayi. Tura wáitiak ti shiir warartusmiayi” tímiayi.

<sup>57</sup>Nuyá Israer-shuar Jesusan tiarmiayi “Warí, sen̄kuenta (50) uwi takaktsume túmaitiatam Apraáman wáinkiamjai tame.”

<sup>58</sup>Jesussha tímiayi “Ti nekas tájarne, Apraámka pujatsajin Wikia pujajai” tímiayi Jesus.

<sup>59</sup>Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeñia jiiinki wémiayi.

### Kusuru akiinian Jesus tsuármiania nu

**9** <sup>1</sup>Jesus ni unuiniamurijjai wesa áishman̄kan kusuru akiinian wáinkiamiayi. <sup>2</sup>Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarjijain kusuru akiiniait. Niiniuajaimpiash, aparíniuajaimpiash túrunawit?” tiarmiayi.

<sup>3</sup>Jesus tímiayi “Ni tunaarjijainchusha ni aparíniuajainchusha túrunaiti. Antsu Yus ni ayashín túratniua nu paant atí tusa túrunaiti.

<sup>4</sup>Tsawáikia takastiniaiti. Yamaikia Winia akuptukua nuna takatrin túratniuitjai. Kashi ajasmatai takastin atsuttawai. <sup>5</sup>Jú nun̄kanam pujakun shuara enentáin tsáapnimtikratniuitjai” tímiayi. <sup>6</sup>Nuna chichas nun̄ká usukmi nun̄kajai pachimiar kusuru jiin yakarmiayi.

<sup>7</sup>Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar pen̄ker íimiar támiayi.

<sup>8</sup>Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” <sup>9</sup>Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niñki “Ee, wiitjai” tímiayi.

<sup>10</sup>Tutai aniiniak “¿Itiurak yamaikia íimiam?” tiarmiayi.

<sup>11</sup>Niisha tímiayi “Áishman̄ Jesusa nu tsakusan jíirun yakartur “Siruí pajamtai entsanam nijiamauta” turutmiai. Takui wena nijiamaran paant iimpramjai” tímiayi.

<sup>12</sup>Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

**Pariséu kusuru tsuárman inintrusarmiania nu**

<sup>13</sup>Nuyá kusuru tsuárman Pariséunam júkiarmiayi. <sup>14</sup>Kame Jesus kusurun tsuarmia nuĭ ayampratin tsawantauyayi. <sup>15</sup>Tuma asamtai Pariséusha itiurak ímniun tusar aniasarmiayi.

Niisha tímiayi “Jiiruin tsakusan yakaarántai, nijiamaran paant iimjiai.”

<sup>16</sup>Nuyá chíkich Pariséu shuarnumiã nuamtak tunaiyar “Juna tsuáruka Yúsaiyanchuiti. Kame ayampratin tsawantai túraiti” tiarmiayi.

Tura chikichcha “Tunáa shuaraitkiuñkia júnisan túratniun tujinkiaayi” tiarmiayi. Nujai akannaikiarmiayi.

<sup>17</sup>Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

<sup>18</sup>Tura Israer-shuar nekas kusuruítai yamá ímiui tu enentáimtuscharmiayi Pariseu. Tuma ásar ni aparíncha untsukar <sup>19</sup>inintrusarmiayi “¿Ame uchiram kusuru akiinia tárugna nukait. Itiurak yamaikia iimia?” tiarmiayi.

<sup>20</sup>Ni aparísha tiarmiayi “Ii uchirínkia kusuru akiiniama nu nékaji.

<sup>21</sup>Tura iisha nékatsji itiurak yamaikia iimia. ¿Yátsuk péñker tsuáruit?

Niisha úuntchakait, nii aniastarum. Niñki ujatmakarti” tiarmiayi.

<sup>22</sup>Sapijmiak tiarmiayi. Israer-shuara úntrínkia “Jesus Yus akupkamu asa nekas Krístuítai” tuinia núnaka Israer-shuara iruntainmaya jiki akupnakti tiniu ásarmatai tsuarma aparí ashankarmiayi. <sup>23</sup>Nu asamtai ni aparí “Niisha úuntchakait, nii aniastarum” tiarmiayi.

<sup>24</sup>Nuñkia Israer-shuara uuntri kusuru tsuárman ataksha untsuk tiarmiayi “Yus ímmianum nekasa nu titiá, ju áishmankka tunaarinniuiti nékaji” tiarmiayi.

<sup>25</sup>Tutai tímiayi “Kame tunaarinchashit. Nékatshajai. Antsu junak nékajai. Yaunchu kusuruítai yamaikia ímjiai.”

<sup>26</sup>Ataksha aniiniak “¿Itiurtámkama. Itiur ímtikrammia?” tiarmiayi.

<sup>27</sup>Niisha tímiayi “Yaunchu tájarme tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

<sup>28</sup>Nuñkia katsekkar “Ámeke ní shuarínme. Tura iikia Muisaisa shuaríntji, tiarmiayi. <sup>29</sup>Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

<sup>30</sup>Áishman tsuarma tímiayi “¿Ausha itiurtsuk áminiait? Winia ímtikrurma nu átumka nékatshume tuyankit. <sup>31</sup>Paant nékaji tunaarinniun Yus anturtsui. Tikishmatar ni wakeramun túruinia nunak anturui. <sup>32</sup>Yáunchusha kusuru akiinian tsuáruka tuke atsuwaiti. <sup>33</sup>Ju áishman Yúsaiyanchuitkiunka penké túrachaayi” tímiayi.

<sup>34</sup>Nuñkia tiarmiayi “Ámeke tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

### Wakanjín kusurua nu

<sup>35</sup>Kusuru tsuárman jiīki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

<sup>36</sup>Tsuarma tímiayi “Uunta, turuttia wisha nekaan enentáimtustaj.”

<sup>37</sup>Jesussha tímiayi “Wainme. Wiitjai ámijjai chichaajna nu.”

<sup>38</sup>Tutai, tikishmatar “Uunta, enentáimtajme” Jesusan tímiayi.

<sup>39</sup>Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru āin iimtikinian tura anānmamuk “Yusnan nekaan paant iimjai” tana nuna ukusturtinian táwitjai” tímiayi.

<sup>40</sup>Tutai Pariséu shuar nū pujuarmia nu nuna antukar “¿Nuīkia iikia kusurukaitiaj’?” tiarmiayi.

<sup>41</sup>Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” tímiayi.

### Iikia murikiua áintsar aji

**10** <sup>1</sup>Jesus tímiayi “Wi tájana nu ti nekasaiti. Shuar murikiun takakna nu ni murikr̄in wenuimiunam kashi ikuiawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam waȳachmin asa tanishnum waruk yajá waȳawainti.

<sup>2</sup>Antsu murikiu wáinniuka wáitiniam waȳawai. <sup>3</sup>Waiti wáinniuka nekas murikiun wáinniun wáitin uratui. Muriksha ni wáinniur̄i chichamen nékainiawai. Niisha ashí ni murikr̄in chikichik chikichik náar̄in anaitius untsúawai. Tura tsawāikia ni murikr̄in jiīki ayurtainiam yarumui.

<sup>4</sup>Tura ashí ni murikr̄in jiīr émtuki wéawai. Muriksha ni chichamen ántuiniak untsuam nemarainiawai. <sup>5</sup>Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

<sup>6</sup>Nu métek-taku chichamnaka Jesus áujmatsamiayi tura shuar antukar nekaacharmiai.

### Pénker wáinniuka Jesusaiti

<sup>7</sup>Nuyá Jesus tímiayi “Ti nekasan tájarme. Wenuimiu wáitir̄i murik wainia nuka Wiitjai. Shuarsha murikiu áintsar Winí waȳamin áiniawai.

<sup>8</sup>Wi táatsāin ashí táaruka kasa áiniak winia shuarun kasamkatai tusa wakeriarmiayi. Tura winia murikiur Wíi shuar áiniak nu shuaran anturkacharmiayi. <sup>9</sup>Wikia wáititjai. Ashí Winin waȳāka uwemprattawai. Tura murikiua áintsan̄ wenuimiunmayā jiīnki pénker yurumáttawai tura atak wayá ayamprattawai’ tímiayi.

<sup>10</sup>‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. <sup>11</sup>Wikia pénker wáinniuitjai. Pénker wáinniuka

ni murikrin uwemtikrartaj tusa jakattawai. <sup>12</sup>Antsu aya kuitjai takauka ni murikrichu ániakui tura nekas wánniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. <sup>13</sup>Nu shuarsha akikiam takáa asa murikiun enentáimtsui. Nu asamtai aya pisaawai' tímiayi.

<sup>14-15</sup>Wikia péñker wánniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrartaj tusan jakattajai. <sup>16</sup>Chíkich muriknasha takakjai. Nusha ju wenuimiummayanchu ániawai. Nunasha itiattajai. Nu muriksha Winia umirtukar ashí métek matsamsar chikichík wenuimiummaya ajasartatui tura chikichik wáinin átatui' tímiayi.

<sup>17</sup>Winia murikrun uwemtikrartaj tusan jakattajai turan atak nantaktiatjai. Nu asamtai winia Apar anentui. <sup>18</sup>Wi wakerakun jakattajai. Wi wakerachkuinkia chíkichkia mantuachminiait. Jákatniuncha tura nantaktinniasha winia Apar surusuiti" tímiayi Jesus.

<sup>19</sup>Israer-shuarsha nuna antukar niisháa enentáimprar kanakiarmiayi. <sup>20</sup>Untsurí tiarmiayi "¿Urukamtai ántarum wáuruk tausha. Yajauch wakanin takaktsuk?" <sup>21</sup>Tura chikichcha tiarmiayi "¿Yajauch wakantrinniasha núnisan chichasminkiait. Yajauch wakantrinniasha kusurun ímtikramniashit?" tiarmiayi.

### Israer-shuarka Jesusan nakitiarmiania nu

<sup>22</sup>Micha nantutin Israer-shuar Jerusarénnum namperan najanainiawai. Nu nampernumsha Yusa Uunt Jee atak jeamman enentáimtuiniawai.

<sup>23</sup>Jesussha Yusa Uunt Jee áachiniam wekasamiayi Sarumúnka wáitiria nui.

<sup>24</sup>Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

<sup>25</sup>Tutai Jesus tímiayi "Yaunchu tiniu ain enentáimturachmarme. Winia Apar akupkamun takaajna nu ti paant awajtawai. <sup>26</sup>Tura átumka winia murikruchu asarum enentáimturtsurme. <sup>27</sup>Wisha winia murikrun untsuam anturtuiniak nemartuiniawai. Wisha wínianak mash nékajai. <sup>28</sup>Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? <sup>29</sup>Winia Apar murikiun surusuiti. Niisha ashí nankaamas kakaram asamtai ¿yaki uwejeyan atankit? <sup>30</sup>Wisha winia Aparjai iisha aya chikichkiitji" tímiayi Jesus.

<sup>31</sup>Tutai Israer-shuarsha atak kayan achikiar tukutaj tiarmiayi.

<sup>32</sup>Jesussha tímiayi "Winia Aparu kakarmarijai ti untsuri péñkera nuna takasuitjai. ¿Tújaimpia mantuattarum?"

<sup>33</sup>Israer-shuarsha Nin tiarmiayi "Péñker túra asakmin máataj tátsuji antsu Yus yajauch chicharkumin túrattajai. Ámeká shuáraitatam Yusa nuke enentáimtumame" tiarmiayi.



<sup>34</sup>Nuyá Jesussha tímiayi “Atumí akupeamur<sup>in</sup> Yus timia nu áarmaiti: “Átum yúsaitrume” tawai. <sup>35</sup>Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. <sup>36</sup>Niisha yúsaitkiu<sup>in</sup>kuia nuikia Yus Apa anaikia ju nu<sup>n</sup>kanam akupkamu asan ti nekas Yúschakaitaj. Nújain<sup>in</sup>kuia wi “Yusa Uchir<sup>in</sup>tjai” takui çitiurak “Yusan yajauch chicharui” túrutrum? <sup>37</sup>Winia Apar túramu túrachku<sup>in</sup>kuia enentáimtursairap. <sup>38</sup>Tura nekas túraku<sup>in</sup>kuia enentáimtursatarum. Tura Winia nakitrakrumsha nuikia wi túramu enentáimtustarum. Nujain<sup>in</sup>kuia winia Apar Winin pujamu ashí nekaattarme. Núnisnak Wisha Ni<sup>in</sup> pujajai. Iisha chikichkiitji.” <sup>39</sup>Tutai ataksha sepunam en<sup>ke</sup>atai tiarmiayi. Túrasa Jesus uwempramiayi.

<sup>40</sup>Nuyá Jesus Jurta<sup>n</sup> entsa amain wé yaunchu Juan imiakrattainium pujusmiayi. <sup>41</sup>Ti untsur<sup>i</sup> shuar iyuwar tiarmiayi “Nekas Juan<sup>ka</sup> aentsti tujintiamun túrachiat ashí Jesusnan tímia nu nekasaiti” tu tiarmiayi. <sup>42</sup>Nu<sup>i</sup>sha untsur<sup>i</sup> Jesusan enentáimtusarmiayi.

### Rásaru jakamu

**11** <sup>1</sup>Petania péprunam áishman, ni naari Rásaru, jaa pujumiayi. Nu péprunam Marí ni kaj<sup>ij</sup>ajai Már<sup>t</sup>ajajai pujumiayi. <sup>2</sup>Niisha Rásaru umai ármiayi. Nu Marisha ukunman<sup>ka</sup> kun<sup>n</sup>kuinian sumak Jesusan kuer ni intiash<sup>ij</sup>ajai japirmiayi. <sup>3</sup>Tura Rásaru jaakui ni umai Jesusan chichaman akuptuiniak tiarmiayi “Uunta, ame amikrum jaawai.”

<sup>4</sup>Jesussha nuna antuk tímiayi “Tuke jakataj tusa jaatsui. Antsu Yusa kakarmar<sup>i</sup>sha tura ni Uchir<sup>i</sup> kakarmar<sup>i</sup>sha jú sun<sup>kur</sup> tsuarmanum paant atí tusa jaawai.” <sup>5</sup>Jesus Már<sup>t</sup>ancha ni kaj<sup>n</sup>cha tura ni umai Rásaruncha nekas aneemiayi. <sup>6</sup>Túmaitiat Rásaru jaawai taman antukiat ni pujamunam jimiará tsawant pujusmiayi. <sup>7</sup>Nuyá ni unuiniamur<sup>in</sup> “Ataksha Jutía nu<sup>n</sup>kanam wetái” tímiayi.

<sup>8</sup>Tura ni unuiniamur<sup>i</sup>sha tiarmiayi “Uunta, nuiksha Israer-shuar kayajajai tukurmar mantamatai tícharmaka. ¿Nu<sup>i</sup> ataksha wétai támek?”

<sup>9</sup>Jesussha ju métek-taku chichaman tímiayi “Tsawaj<sup>ik</sup>ia páantchakait. Tsawaj wekaana nu paant asamtai tukumkashtatui. <sup>10</sup>Tura kashi wekaana nusha kirit asamtai tukumkát<sup>t</sup>wawai. Núnisan<sup>n</sup> Wíi tuke pujakun winia takatron takastiniaitjai. Túraknasha itiurchatan wáinkiashtatjai.” <sup>11</sup>Nuyásha Jesus atak tímiayi “Ii amikr<sup>i</sup> Rásaru kanarai. Wi ishintiartatjai.”

<sup>12</sup>Tutai ni unuiniamur<sup>i</sup> tiarmiayi “Uunta, aya kanarka nu<sup>n</sup>kuia pé<sup>n</sup>ker ajastatui.” <sup>13</sup>Jesuska Rásaru jakamu nékayat “kanarai” tímiayi. Tura ni unuiniamur<sup>i</sup> Rásaru kajinmakua áintsan<sup>n</sup> kanarai enentáimprarmiayi.

<sup>14</sup>Jesus nuikia ti paant tímiayi “Rásaru yamaikia jakayi. <sup>15</sup>Tura nu<sup>i</sup> pujuscha asan kúntuts pujatsjai. Jean túrattajna nu ísrum ti nekas

enentáimtusattarme. Nuna nekaan shiir enentáimjai. Wátsek, iyutai.”  
 16Nuyá Jimiampramu Tumas chíkich unuiniamurí nui armia nuna “Iisha weri Niijiai métek jakatai” tímiayi.

### Iwiaaku átinniasha jaka nantaktinniasha Jesus nérenniuiti

17Nui taa, Rásarun kuaru tsawant ikiusman wáinkiamiyi. 18Petania pépruka Jerusarennumia maintainiú kirumitru áinis tjiuchiiti. 19Tuma asamtai untsurí Israer-shuar Márta Marísha, ni umai jakamtai uutkui atsankratay tusa weriarmiayi. 20Márta Jesus tjiuch ajasun nekáa inkiuntajtsa wémiayi. Antsu Marikia jeá pujumiayi. 21Tura Marta Jesusan inkiun tímiayi “Uunta, Ame pujakminkia winia umar jákachaayi. 22Tura tuke nékajai ashí Yus seamna nuna súramui.”

23Jesussha tímiayi “Ame umaimisha nantaktiatui.”

24Márta Jesussha tímiayi “Nekas, ashí amuamunam jákaru nantaktin tsawantai nantaktiatui. Nuna nékajai.”

25Nuyá Jesus tímiayi “Iwiaaku átinia nérentin asan Wikia iniantkartinaitjai. Winia enentáimturna nuka jakasha nantaktiatui.

26Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

27Niisha “Ee, Uunta, ame Yusa Uchirínme. Krístuitme, uwentikkiartin jú nunkanam tátinia nu” tímiayi.

### Jesus Rásaru iwiarsamunam taa útmiania nu

28Márta Jesussha nuna ti, ni kai Marin untsuk úukan tímiayi “Uunt jui taa untsurmawai.” 29Marisha nuna antuk wárik wajaki Jesusa iyuttsa wémiayi. 30Jesussha péprunam jeatsuk Marta inkiunmanum pujumiayi. 31Marí wari wajaki wématai Israer-shuar nu jeanam atsankratssa pujuiniasha nuna ísar weriarmiayi. Iwiarsamunam úuttiasa wétsuash tusa weriarmiayi. 32Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

33Jesussha Marincha tura niijiai útuncha wáiniak wáitnentaimta asa ti kúntuts pujusmiayi. 34Tura “Tui iwiarsamarum” tímiayi.

Niisha “Uunta, iitia” tiarmiayi.

35Jesussha útumiayi. 36Israer-shuarsha “Ti aneatsuk” tiarmiayi. 37Tura chíkich “Kusuru tsuaruchukait. Nii pujakuisha Rásaru jákaampiash” tiarmiayi.

### Rásaru iniantkimiu

38Jesussha ti kúntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. 39Tura Jesus “Kaya jurustarum” tímiayi.

Rásaru umai Marta tímiayi “Uunta, kuaru tsawant jákaiti. Mejeatsuk’ tímiayi.

40 Tura Jesus tímiayi “Yus enentáimtakmeká Yusa kakarmari wáinkíattame tíchamkajam.” 41 Nuikia kayarín uratiarmatai Jesus nayáimpin iis tímiayi “Aparu, Winia anturtakmin yumínsajme. 42 Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.” 43 Nuna tinia kakaram untsuak “Rásaru jíinkitia” tímiayi. 44 Nujáinkia penuarmartiuk jíinkimiayi. Yapinmasha jaanchjiaí ijiamuyayi. Tura Jesus “Atirtarum. Wéti” tímiayi.

### Jesusan achiktin chichaman jurusarmiania nu

(Mat. 26.1-5; Mar. 14.1-2; Ruk. 22.1-2)

45 Untsurí Israer-shuar Marin nemariaru Jesus túramun ísar enentáimtusarmiayi. 46 Tura chíkichkia Paríséunam wear Jesus túramun ujakarmiayi. 47 Nuna antukar Paríséusha Israer-patri úuntriasha ashí naamka uunt armia nujáí iruntrar tiarmiayi “¿Warí itiurkamniait? Nu shuarka aentsti tujintiamun ti túratsuk. 48 Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

49 Nu uwitin Kaipias Israer-patri uuntriyaí. Niisha tímiayi “Átumka nékatsrume. 50 ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi. 51 Kaipiaska aya ni enentáimmiajajín tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújajinkia Israer-shuar Jesus jaruktinian ujakmiayi. 52 Tura aya Israer-shuarnakcha antsu níijiaísha ashí nunkanam Yus-shuar ajasarun irurtajtsa jákatniuyi. 53 Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

54 Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jíinki atsamu nunkanam Eprain pepru tíjiuch wémiayi. Tura nuí pujusmiayi ni unuiniamurijiaí.

55 Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsajín Muisais timia núnisan ni ayashísha enentáisha iwiarnarat tusa wakeriarmiayi. 56 Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. 57 Paríséusha Israer-patri uuntriasha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

### Marí Jesusan kunkuinian kuérmiania nu

(Mat. 26.6-13; Mar. 14.3-9)

**12** <sup>1</sup>Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuín pujumiayi. <sup>2</sup>Jesus jeamtai ayurawarmiayi. Rásarusha níijiaí yurumámiayi.

Mártasha yurumkan iwiasmakmiayi. <sup>3</sup>Tura Marikia kunkuinian ti kuitjaj*̄* ritru ajapén sumak itiamiayi. Tura Jesusa nawen kuer ni intiashijjaj*̄* japirmiayi. Jeasha nu kunkuinjaj*̄* ti shiir kunkunmiayi. <sup>4</sup>Jútas Iskariúti, Semunka uchirí, nū pujumiayi. Niisha Jesusa unuiniamuríntiat ukunam Jesusan surukmiayi máawarat tusa. Niisha tímiayi <sup>5</sup>“¿Urukamtai nu kunkuinian ti kuitjaj*̄* surukchama kuítrinchan súsatniun?” <sup>6</sup>Kame kuítrinchan enentáimtak tíchamiayi. Antsu unuiniamu kuítrín wainkia asa yúpichuch kasamkamniuyayi. Tuma asa nuna tímiayi.

<sup>7</sup>Tura Jesus tímiayi “Iniaisata. Wi iwiarnakui kuératniun sumak ikiirtusuiti. <sup>8</sup>Kuítríncha tuke atumjaj*̄* íruntsuk. Antsu Wikia atumjaj*̄* tuke pujuschattajai” tímiayi.

### Rásaruncha máataj tiarmiania nu

<sup>9</sup>Israer-shuarsha Jesus Petania péprunam pujan antukar Jesus íistaisar weriarmiayi. Rásaruncha Jesus jakamunmaya iniantkimiua nusha iyutai tusar wearmiayi. <sup>10</sup>Túramtai Israer-patri uuntrinka chichaman jurusarmiayi Rásaru maatai tusar. <sup>11</sup>Untsurí Israer-shuar Rásaru iniantkimiun nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

### Jesus Jerusarénnum shiir wayamiania nu (Mat. 21.1-11; Mar. 11.1-11; Ruk. 19.28-40)

<sup>12</sup>Paskua namperan pachiintiuktajtsa ti untsurí shuar Jerusarénnum wearmiayi. Kashin tsawar Jesus nú peprunam tátinian nekaawarmiayi. <sup>13</sup>Niisha tintiuki nuké áinis nukan júurar Jesusan inkuntai tusar jíinkiar*mi*ayi. Túrawar untsuainiak “Shiir tati, tiarmiayi. Yusa kakarmarijaj*̄* winiana nu tí pénkeraiti. Israer-shuara uuntri asa shiir atí” tu untsuarmiayi. <sup>14</sup>Jesussha umpuurun wáiniak entsamkamai. Núnisan̄ áarmaiti Yus-Chichamnum:

<sup>15</sup>“Seū péprunmaya shuara, ashamkairap. Atumí Akupniuri umpuurunam entsamak winiawai.”

<sup>16</sup>Nu chichamaik Jesusa unuiniamurí nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan̄ túrunamiayi.

<sup>17</sup>Jesus Rásaru iwiansamunmaya iniantkimiun wáinkiarua nú shuar nuna áujmatiar*mi*ayi. <sup>18</sup>Tuma asamtai shuar Jesus nu tujintiamun túramtai nekaawar Jesusan inkuntaj tusar jíinkiar*mi*ayi. <sup>19</sup>Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

### Kriaku apach Jesusjaj*̄* chichastinian wakeriarmiania nu

<sup>20</sup>Paskua nampernum Yus shiir awajsatniun Jerusarénnum weriaruka untsurí nunkanmaya shuar ármiai. Kriaku apachcha ármiai. <sup>21</sup>Niisha

Jiripin weantukarmiayi. Kame nu Jiripi Petsaitia péprunmayayayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaitisar wakeraji” tiarmiayi. <sup>22</sup>Jiripisha Antresan werí ujakmiayi. Nuyá niijai métek tsaninkiar Jesusan weriar ujakarmiayi.

<sup>23</sup>Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai. <sup>24</sup>Wi tájana nu ti nekasaiti. Jinkiuia ántsanketjai. Araachmaka ninki pujatsuk. Antsu aramka tsapain jinkiaichiri kaushmariat nerek ti untsuri ajatsuk. Núnisnak Wi jakamtai ti untsuri shuar yamaram iwiaakman takusartatui. <sup>25</sup>Shuarsha jinkiaia nuke aya ju nunkanam pénker pujustinian enentáimkinka ántar pujak nekas iwiaakmarn emenkaktatui. Tura ju nunkanam pénker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. <sup>26</sup>Shuar winia átaj takunka nemartusti. Túranka Wi pujajna nui Wíi shuar tuke átatui. Núnisan Wíi shuar winia takatron takáa nuna winia Aparsha shiir enentáimtustatui’ tímiayi.

### Jesus ni jákatniun étserei

<sup>27</sup>‘Yamaikia enentáirui ti itirchat pujajai. ¿Warittiajak. “Aparu, ju túrunatniunmaya uwemtikurra” titiajash? Antsu ju túrunatniun táwitjai. <sup>28</sup>Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

<sup>29</sup>Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

<sup>30</sup>Jesussha tímiayi “Wi antuktinian chichaschayi antsu átum nekaatarum tusa chichasai. <sup>31</sup>Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. <sup>32</sup>Tura numiniam awajnantai ashí nunkanmayanka shuar enentáimturartatui” tímiayi. <sup>33</sup>Juna taku krúsnum jákatniun ujakmiayi.

<sup>34</sup>Shuarsha awajirar tiarmiayi “Yaunchu Yus akupkamu papiniumia áujсар nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnitniuiti” tame? Aents Ajasuka Krístuchukait, Yus anaikiamu. Núchaitkiunkia Aents Ajasuka yait?” tiarmiayi.

<sup>35</sup>Nunkia Jesus tímiayi “Wi tsáapninia áintsanketjai. Tsáapnisha atumin aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui itiuranimpia wea. <sup>36</sup>Tsáapnin wáinkiuram nin enentáimtustarum. Túrakrum winia tsáapnintrui wekasattarme.” Jesussha nuna ti wémiayi uumak pujustaj tusa.

### Untsurí Israer-shuar Jesusan enentáimtuscharmiania nu

<sup>37</sup>Jesus aentsti tujintiamun ti untsurí túramtaisha Nin enentáimtuscharmiayi. <sup>38</sup>Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?”  
tu áarmaiti.

<sup>39</sup>Nuna uminiak Jesusan enentáimtuscharmiayi. Tura nu arantcha Isayas áarmiai:

<sup>40</sup>“Yus nin kusuru awajsaiti tura ni enentáincha kátsuram awajsaiti.  
Ni jijijai fimsain tusa tura ni enentájijai nekaawain tusa túrait.  
Kame ni tunaari iisar enentáimtuiniakui Yus nin tsúarainti” tu áarmaiti.

<sup>41</sup>Isayas yaunchu Jesusan nayaimpiniam ti shiir pujan wáiniak nuna tímiayi.

<sup>42</sup>Tuma ain untsurí Israer-shuarsha tura ni uuntrinmayasha Jesusan nekas enentáimtusarmiai. Tura niisha Paríséun ashamainiak paant tícharmiayi. Israer-shuara iruntairiya jiki awetamaj tusa ashammiarmiayi. <sup>43</sup>Yus shiir enentáimtursati tutsuk antsu shuar shiir enentáimtursati tusar túrawarmiayi.

### Shuaran sumamtikiatniun táchaitjai antsu uwemtikratniun táwitjai, timiania nu

<sup>44</sup>Jesus kakantar untsurí tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. <sup>45</sup>Winia wáitkiusha Winia Aparnasha wáinui. <sup>46</sup>Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. <sup>47</sup>Shuaran sumamtikiatniun táchaitjai antsu uwemtikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai. <sup>48</sup>Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantai nin sumamtikiattawai. <sup>49</sup>Wi enentáimmiyajain chichaatsjai. Winia Apar akattur akuptukuiti. Tura chichastinia nuna surusuiti. <sup>50</sup>Wisha nékajai, ashí winia Apar akupeamuka yamaram iwiaakman tuke amuukashinian súawai. Tuma asantai winia Apar túrutmia núnisnak tajai” tímiayi Jesus.

### Jesus ni unuiniamurí nawen nijiatramiania nu

**13** <sup>1</sup>Paskua jísat jeatin chikichík tsawant ajasmatai Jesusa tsawantrí jeatemayi. Túramtai ju nunkan ikiuki ni Aparín wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. <sup>2</sup>Nu

tsawantajsha murikiun yúatin ármiai. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiai. <sup>3</sup>Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa <sup>4</sup>chíkich yurumuk pujuiniaj wajakmiayi. Tura pushirin ámiak awankéman emenmamamiayi. <sup>5</sup>Nuyá nijaamatainiam entsan yará ni unuiniamuri nawen nijiatramiai. Tura awankémjaj japirmiayi. <sup>6</sup>Semun Pítrunam jeamtai Pítiur tímiayi “Uunta, ¿Winia nawer nijartaj tamek?”

<sup>7</sup>Jesussha tímiayi “Wi túrajna nu yamáí nékatsme tura ukunam nekaattame.”

<sup>8</sup>Tura Pítiur tímiayi “Penké winia nawer nijarchattame.”

Jesussha tímiayi “Wi nijaachkuinka Wijiaj tsaninka pujuschamniatme.”

<sup>9</sup>Tutai Semun Pítiur tímiayi “Nuinka, Uunta, aya nawerkechu antsu uwejrusha tura muukarsha nijiatrurta.”

<sup>10</sup>Tura Jesus tímiayi “Yamáí mainkia ayashí shiir asamtai aya nawenin nijamártiniaiti. Atumí enentáin ashí péñkeraitrume. Túrashashí shuarcha” tímiayi. <sup>11</sup>Kame Jútas Nin suruktiniam nekáa “ashí shuarcha” tímiayi.

<sup>12</sup>Jesussha nijiar umik ni pushirin entsarmiayi. Tura atak pujus tímiayi “¿Atumsha Wi túrajna nu nekaarmek? <sup>13</sup>Wi atumí Uuntri asamtai nekas “Uunta” túrutrume. Nusha péñkeraiti. <sup>14</sup>Tura Jintinniuitiatan tura Úuntaitiatan atumí nawen nijarchajak. Atumsha núnisrumek nuamtak náwem nijiatnairatarum. <sup>15</sup>Atumin nekapruatsan túramjai. Atumsha núnisrumek túratarum. <sup>16</sup>Ti nekasán tajai. Takarniuka ni uuntri nankaamaschaiti. Akupkamusha akupea nuna nankaamaschaiti. <sup>17</sup>Nu nekaarum túrakrumka shiir átatrume.”

<sup>18</sup>Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijiaj yurumna nu winia nemasur ajasai.”

<sup>19</sup>Nuka túmatsain ujaajrume. Nuyá túrunamtai Yusa Uchiríntjai nusha paant nekaattarme. <sup>20</sup>Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

### Jesus Jútas Nin suruktiniam étserui

(Mat. 26.20-25; Mar. 14.17-21; Ruk. 22.21-23)

<sup>21</sup>Nuna ti, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juí atumjai pujana nu Winia surutkattawai.”

<sup>22</sup>Tutai ni unuiniamuri nuamtak íniaisar “¿Yanak ta?” tiarmiayi.

<sup>23</sup>Chikichík unuiniamuri, Jesus ti aneamu, Nijiaj tsanin yurumuk pujumiayi.

<sup>24</sup>Tuma asamtai Semun Pítiur ni uwejéjaj iniakmas “Aniasta, ¿yanak áujmata?” tímiayi.

<sup>25</sup>Tutai Jesusan áyanmatsan aniasmiayi. “¿Yait, Uunta?” tímiayi.

<sup>26</sup>Jesusha ayak “Tantan túumniun ajun<sub>kan</sub> susattaj núiti” tímiayi. Nújaj<sub>n</sub> tantan túumniun ajun Semun<sub>ka</sub> uchir<sub>n</sub> Jútas Iskariútin susamiayi. <sup>27</sup>Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túrattamna nu wárik túrata.”

<sup>28</sup>Tura ashí nu<sub>j</sub> yurumainiak pujuarmia nusha wariniak ta tusa nekaacharmiayi. <sup>29</sup>“Kuítrincha kuit súserta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi. <sup>30</sup>Jútas tantan yua kashi ajasmanum jíinkimiayi.

### Yamaram akupkamu

<sup>31</sup>Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarisha ti paant átatui. <sup>32</sup>Wi Yusa kakarmar<sub>n</sub> paant awajeakui Wisha ni Uchirí asamtai winia kakarmarnasha Yuska wárik paant awajsattawai. <sup>33</sup>Uchichiru, atum<sub>jaj</sub> ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia eátkáttarme tura wi wéamunam winishtatume. <sup>34</sup>Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitume. <sup>35</sup>Anenaiyakrumn<sub>n</sub>kia nujaj ashí shuar “Kristu unuiniamur<sub>i</sub> áiniawai” túramartatui.

### Pítiur Nin natsantratniun Jesus ujakmiania nu (Mat. 26.31-35; Mar. 14.27-31; Ruk. 22.33-34)

<sup>36</sup>Semun Pítiur Jesusan aniasmiayi “Uunta, ¿tua wéam?”

Jesusha tímiayi “Wi wéajna nu<sub>j</sub> yamaikia winichminiaitume. Tura ukunam winittiar<sub>me</sub>.”

<sup>37</sup>Nuyá Pítiur tímiayi “Uunta, ¿urukamtai yamaikia winichminiaitiaj? Ámin yáintajtsan jakataj tajai.”

<sup>38</sup>Jesusha tímiayi “¿Nekasmek táme? Ti nekas tájame, atash shiniatsaj<sub>n</sub> Winia menáintiú natsantrurtatme” tímiayi.

### Jesus Yus-jintiaiti

**14** <sup>1</sup>“Kúntuts pujusairap. Yus enentáimtustarum, Winiasha enentáimtursatarum. <sup>2</sup>Winia Aparu<sub>í</sub> átum pujustin ti an<sub>kan</sub> awai. Tura nuna iwiarataj tusan Aparu<sub>í</sub> wéajai, nekasaiti. Nekaschaitkiu<sub>n</sub>kia ¿ítiurak ujaka<sub>aj</sub>rum? <sup>3</sup>Tura iwiaaran amukan ataksha



tátatjai. Tura tana yaruaktatjarne, wi pujamunam atumsha pujusúk tusan. <sup>4</sup>Wi wéaj nu nékarme tura jintiasha nékarme” tímiayi Jesus.

<sup>5</sup>Tumas tímiayi “Uunta, Ame weam nu nékatsji. ¿Jintiasha itiurak nekaattaj’?”

<sup>6</sup>Jessussha tímiayi “Wi nekas jíntiaitjai. Wíjiaínchu wekaana nuka winia Aparuú jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikajai. Wisha shuáran yamaram iwiaakman tuke amuukashtinian súwitjai. <sup>7</sup>Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

<sup>8</sup>Nuínkia Jiripisha tímiayi “Uunta, Apasha wáinkiarka maak.”

<sup>9</sup>Jessussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame? <sup>10</sup>Winia Aparjai tsanínkian pujakun tura winia Aparsha Wijiaí pujakuí tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. <sup>11</sup>Nekaatarum. Wisha winia Aparjai tsanínkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait. <sup>12</sup>Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuú wéakuí nuna nankaamas tujintiamun túrattawai. <sup>13</sup>Ashí Winia enentáimtursarum seatrumna nuna amastatjai. Nújainkia winia Apar shiir awajnastatui. <sup>14</sup>Winia enentáimtursarum seakrumnínkia ashí túrattajai’ tímiayi.

### Jesus Yusa Wakanín akupkattawai

<sup>15</sup>Atumsha anentkurmeka winia chichamur umiktarum. <sup>16</sup>Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui. <sup>17</sup>Nusha Yusa Wakanínti. Yus-shuarcha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakuí Nii nékarme. Niisha atumí enentáin tuke pujustatui. <sup>18</sup>Mitiaikia áitkiasnak ikiukchattajrume. Atumín atak tátatjai. <sup>19</sup>Ishichik tsawant nankaasmatai chíkich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrume. Tuma asarum wáitkiattarme. <sup>20</sup>Tura nu tsawantai ju nekaattarme. Wisha winia Aparjai tsanínkia pujakur chikichkiitji. Núnisnak Wisha atumjai tsanínkian pujajai. Tura atumsha Wijiaí tsanínkia pujarme. <sup>21</sup>Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin anejai tura nekarati tusan iniaktustatjai.” Jesus nuna tímiayi.

<sup>22</sup>Chíkich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

<sup>23</sup>Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wissha winia Aparnum nu shuarjaj̄i tsaniñkia pujustaj̄i. <sup>24</sup>Antsu Winia anentchaka tájana nuna enentáimtsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

<sup>25</sup>‘Atumjaj̄i tuke pujakun nuna tájarne. <sup>26</sup>Yus Apa ni Shiir Wakanin̄ atumin yáinmak atsantamprarat tusa akupturmaktatrome. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

<sup>27</sup>‘Imiatkinchanum pujustarum. Imiatkinchanum pujajna núnisrumek pujustarum tusan amaajai. J̄ú nun̄kanman̄ka warastin̄ wáinkiashtatrome. Antsu itiurchatnum pujayatrumkesha Wij̄ijaj̄i imiatkinchanum pujustatrome. Ashamtsuk pujustarum. Itiurchat enentáimprairap. <sup>28</sup>Nuik timiaj̄ nu antukmarme. Aparuú wena atak atumiñ̄n̄ tátatjai. Winia Aparka Wij̄ijaj̄i nan̄kaamas úntaiti. Tuma asamtai ti nekas anentkurmeka “Aparuú wéajai” takui ashí waras̄ar̄me. <sup>29</sup>Nuka túmats̄ain̄ ujaajrume. Túrunamtai nuyá Winia enentáimtursattarme” tímiayi.

<sup>30</sup>‘J̄ú nun̄kanmayan̄ akupin winiakui atumjaj̄i núkap chichaschattajai yamaikia. Wíniaka nupettukchamniaiti. <sup>31</sup>Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetáí’ tímiayi.

### Numi arakma áintsan̄ketjai

**15** <sup>1</sup>‘Winia iwiaakmarun amaakun numi arakma áintsan̄ketjai. Wikia kampuinjai atumsha kanawentrume. Winia Aparsha arakan wáiniua núnisaiti. <sup>2</sup>Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. <sup>3</sup>Wi ujakjarmena nujaj̄i puruarmaitrome. <sup>4</sup>Numí kanawesha kampuin̄ áchitkiachkun̄ka niñki nerechamniaiti. Núnisrumek atumsha Winí áchitkiachkurmeka nerechamniaitrome. Wi atumjaj̄i áchitkiaj̄ núnisrumek atumsha Winí tuke áchitkia atarum’ tímiayi.

<sup>5</sup>‘Wikia kampuinjai atumsha kanawentrume. Kampuñkia kanawen̄ áchitkia núnisnak achiajarme. Tura kanawe ni kampuiniñ̄ áchitkia núnisrum Winí áchitkia atarum. Túrakrumka núkap nerektatrome. Antsu Wij̄ijain̄chuka pen̄ker túratin̄ pen̄ké tujintiarne. <sup>6</sup>Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

<sup>7</sup>‘Tuke Winí áchitkiaitkiurmeka tura winia chichamprusha kajinmattsuk emetarmeka átum wakerarmena nu seakrumin̄ amastatjai. <sup>8</sup>Átum núkap nereakrumniñkia ashí shuar “Nekas Jesusa unuiniamur̄inti” túramartatui tura winia Aparnasha shiir awajsartatui. <sup>9</sup>Winia Apar anenna nútiksanak Wissha atumin aneajrume. Winia

aneamur tuke atarum. <sup>10</sup>Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur áatrume' tímiayi.

<sup>11</sup>'Wi waraajna áintsarmek warastarum tusan nuna tájarme. Tura ti shiir warastatrume. <sup>12</sup>Wi akupkamu júiti: "Wi aneajrumna nútiksarmek ashí anenaitiarum." <sup>13</sup>Shuar ni amikrin yáintaj tusa jakaka ti anenkartichukait. <sup>14</sup>Wi akupeamu takaakrumka atumsha winia amikruitrume. <sup>15</sup>Takarniuka ni uunri takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme. <sup>16</sup>Aya atumí enentáimsamurijjain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum penker túratniuitrume nerektinia áintsarmek. Tura nu nere amuutsuk tuke áiniyai. Tuma asamtai winia Apar searmena nuna amastatui. <sup>17</sup>Júnaka akupeajrume: Nuamtak mai anenai ajatarum' tímiayi.

#### Yus-shuarcha Jesusnasha Níiniuncha nakitiainiawai

<sup>18</sup>Ju nunkanmaya shuar Winia emka nakitrurar atumniasha nakitramarme. <sup>19</sup>Atumsha ju nunkanmaya shuaraitkiurminkia niiniua nútiksan anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. <sup>20</sup>"Takarniuka ni uunri nankaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. <sup>21</sup>Winia Akuptukun nékachu ásar Winia enentáimturkurmin yajauch awajtamsartatui' tímiayi.

<sup>22</sup>'Wi tana Yus-Chichaman nin ujakchamtainka tunaanum sumamacharayi. Antsu ujakma ásar "Nékachkun túraitjai" tíchamin áiniawai. <sup>23</sup>Winia nakitruinia nuka winia Aparnasha nakitiainiawai. <sup>24</sup>Aents penké túrachman túrachuitkiuinka tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. <sup>25</sup>Yaunchu Yus akupkamunam áarmaiti:

"Penké ántar nakitrurarmai."

Nu chicham uminkiatu tusa túrunaiti' tímiayi.

<sup>26</sup>'Tura atsantamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekamtikramprattarme. <sup>27</sup>Atumsha yaunchu Wijiai pujusu asarum nekamtikiattarme' tímiayi.

**16** <sup>1</sup>Átum kanartukairum tusan júnaka tájarme. <sup>2</sup>Israer-shuar iruntainiumia jiiki akuptamkattarme. Nu arantcha mantamainiaksha "Yúsan shiir awajsattsan túrajai" tiártatui. <sup>3</sup>Nu shuar

Winiasha tura winia Aparnasha nékachu ásar túrutmawartatui. <sup>4</sup>Núnaka yamáí tájame. Tura túrunamtai “núnisan átiniaiti” timiaj nu nekaarum itiurchat enentáimprairap’ tímiayi.

### Yusa Wakaní túrana nu

‘Atumjají tuke pujá asan núnaka yaunchu ujakchamajrume. <sup>5</sup>Antsu yamaikia wáketjai winia Akuptukmia nujají pujustaj tusan. Tuma áin wéajna nu inintratsrume. <sup>6</sup>Antsu nuna takuí ti kuntuts enentáimprarme. <sup>7</sup>Tura Wi wématai atumjajínkia nuna nankaamas péñker átatui. Iis, Wi wéaknaka atumin yainmaktinia nuna akupkattajai tura wéachkuínkia táchattawai. Nuka ti nekasaiti. <sup>8</sup>Yusa Wakaní taa ashí jú nunkanmaya aentsun jú menaintiun nekamtikiattawai. Ni tunaarí aan nekamtikiattawai. Péñker tunaajajínchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai. <sup>9</sup>Winia enentáimturainiachu tunáarintin áiniawai. <sup>10</sup>Winia Aparuí wáketkui wáitkiashtatrume. Tuma asamtai ashí shuar wi péñker tunaajajínchu wekaamun nekaawartatui. <sup>11</sup>Tura jú nunkanam akupniunka Yus tunaanum súmamtikia asa shuarnasha súmamtikiamnaiti. Nuna paant nekaawartatui’ tímiayi.

<sup>12</sup>‘Nu arantcha núkap tíntjiarme túrasha átumka nekaachaintrume. <sup>13</sup>Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiajají tíchattawai antsu winia Aparuí antukma nuna ujatmaktatui. Ukunam átatna nunasha ujatmaktatui. <sup>14</sup>Ashí Wínian ujatmak Winia shiir awajtustatui. <sup>15</sup>Ashí winia Apar takakna nusha Wíniaiti. Nu asamtai “ashí Wínian ujatmaktatui” tajai’ tímiayi.

### Kúntuts pujuiniayat ukunam warasartatui

<sup>16</sup>Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuí wéajai” tímiayi.

<sup>17</sup>Nuyá ni unuiniamurí nuamtak aniniaisarmiaiyi “¿Jú chichamsha warimpait? “Ishichik pujusrum wáitkiashtatrume tura ataksha ishichik pujusrum wáitkiattarme tura Aparuí wéajai” tátsuk. <sup>18</sup>“Ishichik pujusrum” tana nusha ¿warimpait? Nii tana nu ántatsji” tiarmiaiyi.

<sup>19</sup>Jesusha nin aniaistai táman nekáa tímiayi “Ishichik pujusrum wáitkiashtatrume nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu? <sup>20</sup>Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma aink<sup>1</sup> átum kúntuts pujayatrume ukunam warastatrume. <sup>21</sup>Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. <sup>22</sup>Atumsha núnisrumek yamaik kúntuts pujarme. Tura atak íitjiarum tusan winiakui ti shiir atumí enentáin warastatrume. Nu warastinian jurutramkichminia áiniawai.’

<sup>23</sup>Nu tsawantinkia penké ininsashtatrumé. Ti nekas tájarme Winia enentáimtusarum winia Apar searum nuna ashí amastatui. <sup>24</sup>Yamaisha Winia enentáimtusarum winia Apar seachurme. Seakrumniñkia amastatui ti shiir warasaruk tusa' tímiayi.

### Jesus jú nunkanmayan nupetkaiti

<sup>25</sup>Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujakatjarme. <sup>26-27</sup>Nu tsawantai átumka Winia enentáimtusarum winia Apar seattarme. Winia Aparsha atumin anea asantai Wi Nin áujsatín atumashtatrumé. Winia anentu asarum tura winia Aparuíya taman enentáimtakrumin Niisha anenmawai. <sup>28</sup>Winia Aparuíya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai" tímiayi.

<sup>29</sup>Nuyá ni unuiniamurí tiarmiayi "Yamaikia métek-taku chichamjainchu chichaame. <sup>30</sup>Mash nékaitme. Shuar Ámin ininmatsajín péñker áimkiatin nékame. Nu nekaar Ame nekas Yúsnumiáitme tu enentáimtaji" tiarmiayi.

<sup>31</sup>Tura Jesus tímiayi "¿Nekasash enentáimtarum? <sup>32</sup>Ti warik átumka ashamkarum niisháa tsakiñmaktatrumé tura Winiak ikiurkittiarne. Antsu winia Apar pujakui Wiki pujatsjai. <sup>33</sup>Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asantai warastarum" tímiayi Jesus.

### Jesus ni unuiniamurín Yúsan áujtawai

**17** <sup>1</sup>Nuna tí Jesus nayaimpinmaaní íimias tímiayi "Aparu, yamáí jeayi ame Uchiram shiir awajsatin. Núnisan ame Uchirmisha péñker awajtamsattawai. <sup>2</sup>Ashí shuara Akupniurí najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. <sup>3</sup>Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asantai ashí shuar nuna enentáimtak yamaram iwiaakman tuke amuukashtinian takakui.'

<sup>4</sup>Ashí túratniun akuptukmamna nuna amukuitjai. Túran jú nunkanam shiir awajsaitjame. <sup>5</sup>Nuna túramtai, Aparu, ti yaunchu jú nunka atsaisha Ámijiai pujakui shiir awajtusmamna núnismek yamaisha shiir awajtusta.'

<sup>6</sup>Ashí jú nunkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti.

<sup>7</sup>Ashí Wi takaajna nu Amek surusuitme. Niisha nuna nékainiawai.

<sup>8</sup>Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.'

<sup>9</sup>Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. <sup>10</sup>Ashí Winia ainia

nuka Áminiuiti. Tura ashí Áminiu ainia nuka Winia ániawai. Winia pênkerusha ni túramunam paant awajsaiti.’

<sup>11</sup>‘Wikia yamaikia jú nunkanam pujuschattajai. Tura nu shuarka jú pujuartatui. Antsu Ámijiaí pujustajtsan winiakui ashí surusumna nuka, Aparu, ti shiir asam ame kakarmarmijiaí wáinkiaata. Wisha Ámijiaí chikichik ájnia núnisan niisha ashí iruntrar chikichik ajasarti. <sup>12</sup>Juú niijiaí pujakun ame kakarmarmijiaí ti pênker wáinkiamjai. Antsu Yus-Chichamnum aarma uminkiaati tusa aya chikichik menkakaiti. Niisha tuke emesnartinia núiti.’

<sup>13</sup>‘Yamaikia Amiini winiajai. Tura jú tuke pujakun júna tájame. Niisha Wi waraajna núnisar ti shiir warasarat tusan tajai. <sup>14</sup>Wi jú nunkanmayanchuitjai. Niisha núnisan jú nunkanmayanchu ániawai. Tuma asamtai ame chichammin Wi susamtaí jú nunkanmaya shuarka nin nakitiainiawai. <sup>15</sup>Jú nunkanmaya jíiki tusan seatsjame. Antsu íwianch nin nupetkaín tusan seajme. <sup>16</sup>Wi juyanchuitiaj áintsan niisha juyanchu ániawai. <sup>17</sup>Ame chichammin ti nekasa nuna ántuiniakui pênker awajsata. <sup>18</sup>Juyá shuarnum akuptukmam áintsan Wisha nin chíkich shuarnum akupeajai. <sup>19</sup>Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin ániawai’ áujtak tímiayi.

<sup>20</sup>‘Aya níniunkeka seatsjame antsu ashí ni chichamen antukar Winia enentáimtusartatna nusha ame yáinkiaata tusan seajme. <sup>21</sup>Ashí niisha chikichikiniak enentáimtusarti tusan seajme. Wisha Amesha, Aparu, chikichik ájnia núnisan niisha Iijiaí iruntrar chikichik ajastai tusar seajme. Wíi shuar chikichik najanata tusan seajme. Nuyá jú nunkanmaya shuar akuptukuitmena nuna nekaawartatui. <sup>22</sup>Ame shiir awajtusamna núnisnak Wisha nin shiir awajsaitjai. Iikia chikichik ájnia núnisan niisha chikichik ajasarti tusan túraitjai. <sup>23</sup>Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

<sup>24</sup>‘Aparu, shuar surusmam nu, Wi pujustajana núi pujusarti tusan seajme. Tura ti shiir awajtusmamna nuna ísarti tusan nuna seajme. Jú núnka najanchamunman tuke anentin asam ti shiir awajtusuitme. <sup>25</sup>Aparu, ti pênker áminiú jú nunkanmaya shuar nekarmainiatsui. Antsu Wi nékajme. Jú shuarsha ame akuptukman nékainiawai. <sup>26</sup>Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

### Suntar Jesusan achikiarmiania nu

(Mat. 26.47-56; Mar. 14.43-50; Ruk. 22.47-53)

**18** <sup>1</sup>Jesusha nuna tinia amuk ni unuiniamurijiaí Setrun entsá katin numi arakmanum wémiayi. <sup>2</sup>Jútassha Nin suruktajtsa pujumia

nuka nu ajan nekaamiayi. Untsurí tsawant Jesus ni unuiniamurijjaj ni untruntramtai Jútas Jesusan nuí wáinkiatniun enentáimpramiayi. <sup>3</sup>Tura untsurí suntarjajsha Jesusan tariarmiayi. Pariséusha Israer-shuar Patri untrishsha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. <sup>4</sup>Jesussha ashí átinia nuna neka asa jiintiuki “¿Ya eaarum?” tímiayi.

<sup>5</sup>Niisha “Nasarénumiá Jesus” tiarmiayi.

Jesussha “Wiitjai” tímiayi.

Jútassha Jesusan surukua nu nijjaj pujuarmiayi. <sup>6</sup>Tura Jesus “Wiitjai” takui ti ashamkar úkumur waketainiak iniaarmiayi.

<sup>7</sup>Ataksha Jesus “¿Ya eaarum?” tímiayi.

Niisha “Nasarénumiá Jesus” tiarmiayi.

<sup>8</sup>Nuinkia Jesus tímiayi “Wiitjai, tájar-me. Winia eatkurmeka Wíi shuar ainia júka wakеткиarti” tímiayi. <sup>9</sup>Jesus nuik aujuk “Winia Apar surusma nu menkakacharai” timia nu uminkiatu tusa Jesus “wakеткиarti” tímiayi. <sup>10</sup>Nuyá Semun Pítiur machitian jusa Marku kuíshin untsuurnumaani tsupirkamiayi. Markusha Israer-patri untrí takarniuriyayi. <sup>11</sup>Túramtai Jesus Pítrun tímiayi “Machitrumka awainki ikiusta. Winia Apar wáitsatniun surakuinkia ¿wáitsashtinkaitiaj?”

**Israer-patri úuntriniam júkiarmiania nu**  
(*Mat. 26.57-58; Mar. 14.53-54; Ruk. 22.54*)

<sup>12</sup>Nuinkia apach suntarsha ni kapitántrishsha Yusa Jeen wainniusha Jesusan achikiar jinikiawarmiayi. <sup>13</sup>Nuyá Anasa jeen júkiarmiayi. Anassha Kaipiasa wearíyayi. Tura Kaipias nu uwitin Israer-patri untriyayi. <sup>14</sup>Kaipiaska nuik “¿Ashí Israer-shuar mesertin pénerkait. Antsu aya chikichik shuar jákatin pénerchakait?” timia núiti.

**Pítiur Jesusan natsantramiania nu**  
(*Mat. 26.69-70; Mar. 14.66-68; Ruk. 22.55-57*)

<sup>15</sup>Semun Pítiur chíkich unuiniamujaj Jesusa uku weriarmiayi. Israer-patri untrí nú unuiniamunka nékauyayi. Tuma asamtai ni jeen jeawar, suntar Jesusjaj aa tanishnum wáiniakui niisha wayamiayi. <sup>16</sup>Tura Pítiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajaj chichas Pítrun awayamiayi. Nuí nékanu asa yúpichuch awayamiayi. <sup>17</sup>Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. <sup>18</sup>Tsetsek asamtai suntarsha tura nuí takarniusha jinia ikiapárar ni nawen anaak pujuarmiayi. Pítrusha nuí pachiiniak anamuk pujumiayi.

**Kaipias Jesusan aniasmiania nu**

(*Mat. 26.59-66; Mar. 14.55-64; Ruk. 22.66-71*)

<sup>19</sup>Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

<sup>20</sup>Jesusha tímiayi “Ashí ímiainiajn tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nu arantutsuk tuke etserkaitjai. <sup>21</sup>¿Urukantai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

<sup>22</sup>Jesus nuna takui Yusa Jeen wáiniua nu nu pujá Jesusan yapiniam awati tímiayi “¿Núnisan nekas úuntnum chichastinkait?”

<sup>23</sup>Jesusha tímiayi “¿Warinmampa yajauch aa? Turuttia. Tura tájana nu péñkeraitkiuinikia ¿urukantai awattiniam?” <sup>24</sup>Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

**Pítiur ataksha Jesusan natsantramiania nu**

(*Mat. 26.71-75; Mar. 14.69-72; Ruk. 22.58-62*)

<sup>25</sup>Tuke Anasa jeen chichainiaí Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

<sup>26</sup>Chíkich takarin, Marku shuari, nu pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjái wekaamin wáinkiachmakajam?”

<sup>27</sup>Pítrusha ataksha “atsá” tain atash shiniukmiayi.

**Piratu Jesusan aniasmiania nu**

(*Mat. 27.1-2, 11-14; Mar. 15.1-5; Ruk. 23.1-5*)

<sup>28</sup>Nuyá Kaipiasaiya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntri akupkamia nunisar wapik ajasaj tusar nu jeenam wayacharmiayi. Wayawarka paskua nampernum yurumáchmin ármiai. <sup>29</sup>Nu asamtai Piratu nijjái chichastaj tusa jiinki tímiayi “¿Jú áishmansha warí tunáa túrait?”

<sup>30</sup>Niisha “Tunaarinchaitkiuinikia amijini itiachajai” tiarmiayi.

<sup>31</sup>Tutai Piratu tímiayi “Atumek júkirum atumí akuptammarijjái ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” <sup>32</sup>Yaunchu Jesus ni jákatniurin enentáimtus “Wi awajnitniuitjai” tímiayi. Niisha krúsnum awajnain asamtai apach máataijjai Nii timia nu uminkiamiayi.

<sup>33</sup>Piratusha atak jeá wayá Jesusan untsuk “¿Ámeka Israera Uunt Akupniurinkaitiam?” tímiayi.



<sup>34</sup>Jesussha tímiayi “¿Amekek nu inintram. Kame chíkich túramainiatsuash?”

<sup>35</sup>Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjaj winin itiarमारai. ¿Warí tunáa túraitiam?”

<sup>36</sup>Nuñkia Jesus tímiayi “Wi jú nunkanam akupniuchitjai. Juyaitkiuñkia Winia nemartuiniana nu máanaikiaraayi. Túrawarmatai Israer-shuarnum surutkacharaayi. Antsu juyān akupniuchitjai.”

<sup>37</sup>Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

<sup>38</sup>Tura Piratu “¿Nekasa nusha warimpiait?” tímiayi.

**Piratu Jesusan mantamnatniun tímiania nu**  
(*Mat. 27.15-31; Mar. 15.6-20; Ruk. 23.13-25*)

Piratusha nuna ti, atak Israer-shuarjaj chichastajtsa jiinki tímiayi “Jú aishmañka tunaarín penké wáittsujai. <sup>39</sup>Tura ashí uwitin paskua nampernum sepunmayā shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurín ankant akupkattajak?” tímiayi.

<sup>40</sup>Nuñkia ashí kakantar unsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

**19** <sup>1</sup>Nuyá Piratu suntaran akupkamiayi Jesusan asutiáwarat tusa. <sup>2</sup>Suntarsha Jesusan wishikrar tawasap jañki najanamun etsenkrumtikiarmiayi. Yamakai pushincha uunt akupniua áintsan áentsrarmiayi. <sup>3</sup>Nuyá “Israera Uuntria, kakaram ajasta” tiar yapiniam awatiarmiayi. <sup>4</sup>Nuyá Piratu atak jiinki tímiayi “Átum wáinkiarum nekaatarum tusan Jesusan jíkítiaj. Wikia tunaarínkia penké wáittsujai.” <sup>5</sup>Tímiatai Jesussha jañkin etsenkruku tura pushin yamakairman entsaru jínkimiyai. Tura Piratu nuí káunkarun tiarmiayi “Pai juiti, íistarum.”

<sup>6</sup>Israer-patri uuntrisha suntarsha Jesusan íisar ataksha ataksha kakantar unsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarín penké wáittsujai” tímiayi.

<sup>7</sup>Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. <sup>8</sup>Nuna antuk Piratusha nu nankaamas ashamkamiayi. <sup>9</sup>Ataksha init wayá Jesusan aniasmiayi “¿Tuyāmpaitiam?” Tura Jesussha penké áikchamiayi. <sup>10</sup>Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

<sup>11</sup>Tutai Jesussha tímiayi “Yus nuna amaschaitkiuñkia penké tujinkiaintme. Nu asamtai amiin surutka nu ámin nankaamas tunaarinniuiti.”

<sup>12</sup>Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuitjai” taku atumí uunt akupniuri nemasrinti” tu untsumkarmiayi.

<sup>13</sup>Piratusha taman antuk akupin pujutainium pujus Jesusan untsukmiayi. Nu kaya ukatkamu asamtai Israer-shuara chichamen Kapata anaikiarmiayi. <sup>14</sup>Paskua jisat jeatsain nantu tutupin ajatsain Piratu Israer-shuaran tímiayi “Uunt akupniuram ístarum.”

<sup>15</sup>Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurin krúsnum máattajak?” tímiayi.

Tura Israer-patri uuntri tiarmiayi “Atumí uunt kapitántrumek in akuptamji. Chíkichka atsawai.”

<sup>16</sup>Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

### Jesusan krúsnum máawarmiania nu

(Mat. 27.32-34; Mar. 15.21-32; Ruk. 23.26-43)

<sup>17</sup>Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. <sup>18</sup>Nu krúsnum ajintrurar awajainiarmiayi. Tura mai pæ jimiara shuaran chikichik chikichik awajainiarmiayi. Tura Jesus ajapén ámiayi. <sup>19</sup>Piratusha Jesusa krúsrin uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi. <sup>20</sup>Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tjiuch asamtai Israer-shuar ti untsurí áujiarmiayi. <sup>21</sup>Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

<sup>22</sup>Tura Piratu nincha áikiar “Wi áaraj nuke átatui” tímiayi.

<sup>23</sup>Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaani apaiyichma takamtsukuyi. <sup>24</sup>Tuma asamtai suntar tiarmiayi “Juka jáakchatai. Antsu nakurakin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

<sup>25</sup>Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. <sup>26</sup>Jesus ni nukuríncha tura ni ti aneamu unuiniamuríncha nu wajan wáiniak ni nukurín tímiayi “Nukuru, ju ame uchirnea áintsan atí.” <sup>27</sup>Nuyá ni unuiniamuríncha

tímiayi “Ju ame nukua áintsan atí.” Nu tsawantaik nu unuiniamurí ni jeen jukí awayámiayi.

### Jesusa jakamurí

(Mat. 27.45-56; Mar. 15.33-41; Ruk. 23.44-49)

<sup>28</sup>Nuyá ashí uminkiamtai Jesus nuna nekáa yaunchu Yus-Papinium aarma uminkiatí tusa “kitiamajai” tímiayi. <sup>29</sup>Nuisha pininum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. <sup>30</sup>Jesusha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

### Suntar Jesusan paenam nanjikijai ijiumiania nu

<sup>31</sup>Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nuí paant aín tusa nakitrarmiayi. Nu asamtai Piratun seainiak “Krúsnum ajintrurma ainia nuna kan̄kajin suntar kupirkarti. Nuyá wari jákarmatai krúsnumia júkiarti” tiarmiayi. <sup>32</sup>Nuyá suntarsha weriar emka krúsnum amia nuna kan̄kajin kupirkarmiayi. Nuyá chikichnasha Jesusjai atsankiar ajintrurma nuna kan̄kajincha kupirkarmiayi. <sup>33</sup>Tura Jesusan weantuk yaunchu jákaiti tusa kan̄kajin kupirtsuk <sup>34</sup>suntar aya paenam ijiumiayi. Ijiumtaisha nu chichamtaik numpa yumijjai puarmiayi. <sup>35</sup>Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. <sup>36</sup>Yaunchu Yus-Chichamnum aarma uminkiatí tusa túrunaiti:

“Ni ukunchin kupirkachartatui” tu áarmaiti.

<sup>37</sup>Tura chikichcha:

“Ijiuarmiania nuna wáinkiertatui” tu áarmaiti.

### Jesús iwiansamu amiania nu

(Mat. 27.57-61; Mar 15.42-47; Ruk. 23.50-56)

<sup>38</sup>Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaitiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. <sup>39</sup>Nikiutémusha Jesusjai chichastaj tusa kashi tarimia nu jimiará kun̄kuin pachimpramun ti nukap sumak itiamiayi. Mira kun̄kuinniasha aruí kun̄kuinniasha sumakmiayi. <sup>40</sup>Nuyá Jusé Nikiutémujai Jesusa ayashín júkiar kun̄kuinian kuérar jaanch esarmajai penuararmiayi. Israer-shuar tuke nunisar ikiúu ármiayi. <sup>41</sup>Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikiuschamuyayi. <sup>42</sup>Nu waa sha tíjiuch asamtai tura Israer-shuara ayampratin tsawantri jeatemamtai Jesusa ayashín nuí iwiansarmiayi.

**Jesus nantakmiania nu**

(*Mat. 28.1-10; Mar. 16.1-8; Ruk. 24.1-12*)

**20** <sup>1</sup>Tumintincha káshik kirit aín Máktaranmaya Marí Jesus iwíarsamunam ístajtsa wémiayi. Jesusan iwíarsar kaya uuntjái waan atutkarmiayi. Tura Marí nui jeá nu kaya uraimiun wáinkiamiayi. <sup>2</sup>Nuna wáiniak Semun Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwíarsamunmaya ii Úuntrin júkiarai. Tura ¿tuínsuk ikiusara?” <sup>3</sup>Pítrusha chíkich unuiniamuríjái jíinkiar iwíarsamunam iyuwarmiayi. <sup>4</sup>Mai métek tsékenkiar Pítiur jeatsáin chíkich unuiniamurí iwíarsamunam emka jeamiayi. <sup>5</sup>Niisha wayatsuk tsuntsumá iis penuarmarínkia nui tepan wáinkiamiayi. <sup>6</sup>Nuyá Semun Pítiur ukunam jeá iwíarsamunam wayá penuarmarí nui tepan wáinkiamiayi. <sup>7</sup>Chíkich jaanchcha Jesusa muuken penuarma nusha nanerma niisháa tepan wáinkiamiayi. <sup>8</sup>Nuyá chíkich unuiniamurí emka tamia nusha iwíarsamunam wayamiayi. Niisha túruna wáiniak “Jesus nekas nantakni” tu enentáimpramiayi. <sup>9</sup>Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi. <sup>10</sup>Nuyá mai ni jeen waketkiarmiayi.

**Máktaranmaya Marincha Jesus wantintiukmiania nu**

(*Mar. 16.9-11*)

<sup>11</sup>Tura Marikia iwíarsamunam juak úutu pujumiayi. Niisha úutiatañ tsuntsumá iwíarsamunam íimsamiayi. <sup>12</sup>Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaani tura chíkichka nawenmaani pujumiayi. <sup>13</sup>Nayaimpinmaya suntarsha “¿Urukamtai úutam?” tiarmiayi.

Marisha tímiayi “Winia Úuntrun jurutkiarai tura ¿tuínsuk ikiusara?”

<sup>14</sup>Nuna tí ayanmar Jesusan wáiniak Nin nekaachmiayi.

<sup>15</sup>Jesus aniak “¿Urukamtai úutam. Ya eeam?” tímiayi.

Marisha ajan wáinnia nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

<sup>16</sup>Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

<sup>17</sup>Jesusha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

<sup>18</sup>Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

**Jesus ni unuiniamurĭn wantintiukmiania nu**  
(*Mat. 28.16-20; Mar. 16.14-18; Ruk. 24.36-49*)

<sup>19</sup>Nu tsawantaĭ, tumiņtin, ni unuiniamurĭ Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shĭir pujustarum” tímiayi. <sup>20</sup>Nuna tĭ, nuyá ni uweĵen ajintruamuncha ni paen iĵiumuncha iniakmasmiayi. Ni unuiniamurĭsha Úuntrin wáinkiar shĭir warasarmiayi. <sup>21</sup>Ataksha Jesus “Shĭir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. <sup>22</sup>Nuyá ni matsatmanumaanĭ umpuá tímiayi “Yusa Shĭir Wakanĭ atumí enentáĭn wayaĭti. <sup>23</sup>Shuara tunaarĭnkia átum “asakártĭ” tákurminkia tsanĭkurnartatui. Tura nu shuar “sumamati” tákurminkia tuke sumama pujawai” tímiayi Jesus.

**Tumas Jesus nantakniun wáinkiamiania nu**

<sup>24</sup>Tura chikichik unuiniamu, Jímiampramu Tumas, Jesus tamia nuĭ pujuchmiayi. <sup>25</sup>Tura ukunam chikich unuiniamurĭ ujainiak “ĭi Uuntri wáinkiaĭi” tiarmiayi.

Tura Tumas tímiayi “Ajintruamurĭ wáinkian uweĵrun awáintĭuatniuitĭai. Tura paenumsha awáintĭuatniuitĭai. Peņké jaka asamtai aya nujai iniantkimiun enentáimtustatĭai” tímiayi.

<sup>26</sup>Chĭkich tumiņtin ataksha Jesusa unuiniamurĭ iruntrarmiayi. Nuiņkia Tumassha niĭĭĭai pujuarmiayi. Tura waiti epenmianumaņ Jesus wayá ajapén wajas “Shĭir pujustarum” tímiayi. <sup>27</sup>Nuyá Tumasán tímiayi “Winia uweĵur ĭsam ame uweĵem awáintĭuata. Núnismek winia paerui uweĵem awáintĭuam ĭstá. Tura arantutsuk nekas enentáimtursata.”

<sup>28</sup>Nuyá Tumas “Winia Úuntrua, nekas winia Yúsruitme” tímiayi.

<sup>29</sup>Jesussha tímiayi “Winia wáitkiam nuĭn enentáimtursame. Antsu Winia wáittsuk enentáimturaru nekas shĭir áiniawai” tímiayi.

**Shuar Yusa Uchirĭn enentáimtusarti tusa ju papĭ áarmaiti**

<sup>30</sup>Aentsti tujintĭamuncha Jesus túramu ti untsurĭ ju papĭnium áarchamu áiniawai. Tura ni unuiniamurĭ mash wáinkiarmai. <sup>31</sup>Antsu Jesuska Kristu asa Yusa Uchirĭnti tu enentáimtustarum tusan júnaka áarmajai. Tura enentáimtakmin Jesus ni iwĭaakmarĭn yamarma nuna amastatui.

**Entsá yantamnum Jesus siati (7) unuiniamurĭn wantintiukmiania nu**

**21** <sup>1</sup>Tipirias antumianka káanmatkariĭn Jesus ni unuiniamurĭn wantintiukmiayi. Júnisan ámiayi. <sup>2</sup>Semuņ Pĭtrusha Jímiampramu Tumassha Kananmayá Natanaérsha Sepetéu uchirĭsha tura chĭkich jímĭar unuiniamurĭsha métek iruntrar pujuarmiayi. <sup>3</sup>Semuņ Pĭtrusha “Namakan nekajai nanĭkiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. <sup>4</sup>Káshik aín Jesus entsá káanmatkarín wantinkiamiayi tura ni unuiniamurísha Jesusan nekaacharmiayi. <sup>5</sup>Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup>Tutai Jesus tímiayi “Neka untsuurnumaani ajunkatarum. Nui achiktatrum.”

Nii timia núnisan túrawar namakan ti achikiar nekan júsatniun tujinkiamiayi. <sup>7</sup>Nújainkia Jesusa unuiniamurí Jesus ti aneemia nu Pítrun tímiayi “Ti Úntrinti.” Takui Pítrusha ámiaku asa ni pushirín entsar entsá iniañmiayi yukuak jeataj tusa. <sup>8</sup>Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi. <sup>9</sup>Káanmatkanam jeawar ji kaijr ámanum namakan jiámun wáinkiamiayi. Tantanha wáinkiamiayi. <sup>10</sup>Jesussha “Átum achikiurmena nuyá jiátin itiatarum” tímiayi. <sup>11</sup>Tutai Semun Pítiur kanunam we nekan nekartiuk káanmatak japiki itiamiayi. Itiar namaknasha siañtu senkuenta nuyá tres (153) nekapmararmiayi. Ti untsurí áyat nekasha jáankachmiayi. <sup>12</sup>Nuyá Jesussha “Yurumáitiarum” tímiayi. Ni unuiniamurísha “aya ii Uuntri áminiaiti” tusar inintrustinian natsantiarmiayi. <sup>13</sup>Nuyá Jesus wajaki tantan jukí súsarmiayi. Núnisan namaknasha súsarmiayi.

<sup>14</sup>Jesus jakamunmayá nantaki jujai menaintiu ni unuiniamurín wantintiukarmiayi.

### Jesus Semun Pítrujai chichasmiania nu

<sup>15</sup>Nuyá yurumáwar Jesus Semun Pítrun aniasmiayi “Junasa uchirí Semunka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturainia nu yañtá” tímiayi. <sup>16</sup>Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. <sup>17</sup>Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. <sup>18</sup>Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstampattawai tura ame wétin nakitiam nuj juramkiartatui.” <sup>19</sup>Jesus nújainkia Pítiur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

**Juan túrunatniun Pitiur Jesusan aniasmiania nu**

<sup>20</sup>Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. <sup>21</sup>Nincha Pítiur wáiniak Jesusan aniasmiai “Uunta, ¿jusha warí urukatniuit?”

<sup>22</sup>Jesussha ayak “Wi wakeraknaka iwiaaku pujain tátatjai tíminiatjai. Nuna tákuisha ¿warí itiurtama? Ámeka nemartusta” tímiayi. <sup>23</sup>Nújainkia “Nu unuiniamurí jákashtatui’ tusa Yus-shuarnum áujmatiarimiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. <sup>24</sup>Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisaran tuńniawai.

<sup>25</sup>Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.